

Ke Surat Diyà te Menge Hibruhanen

Ke Eleteala se Impepenudtul ke Anak din te Kiyug din ne Ibpesabut diyà te menge Etew

1 ¹Rengan ne ruen impesabut te Eleteala riyà te menge keep-epuan tew. Merakel se impesabut din kandan ne merakel dema se impetiralan din kandan, ugaid ne kayi te menge etew ne mibpelambas te lalag te Eleteala ne impesabut din ini su apey sikandan se ebpepenudtul diyà te menge etew. ²Ugaid ne guntaani manen, ne iyan en maa ibpesabut dut te Eleteala kenitew ne ibpepevayà din dut te Anak din si Hisus. Su sikandin se impelimbag din kayi te dunya, ne sikandin dema ke nepemilì te Eleteala ne ebpegekemunayen dut te langun taman. ³Ne ke anlag dut te raman te Eleteala ne egkekita en kayi te Anak din, ne langun ne riyà te Eleteala ne kayi en dema te Anak din. Warà mibiraan dan iya. Ne sikandin se egawed dut te langun ne nelimbag kayi te dunya su kayi ebpuun te gehem dut te lalag din. Ne sikandin dema se mibaal te ebpekepeleyu te menge etew dut te salà din. Ne guna su nepasad din en, ne mid-ulì en diyà te langit ne riyà mibpinuu te egkekewanan te Eleteala ne warà repeng te kedadù din.

Ke Anak te Eleteala se Mepurù pà Dut te Menge Suluhuen

⁴Ketà be ne ke Anak te Eleteala ne iyan pà mepurù dut te langun ne suluhuen. Ne misan ke ngaran ne imbehey te Eleteala kandin ne mepurù pà ini dut te ngaran ne imbehey rin dut te menge suluhuen din. ⁵Su warà mekahi ke Eleteala diyà te menge suluhuen din iring te migkahi rin te Anak din, ke sikandin te,

“Sikew ke Anak ku,

guntaani ne ebpeketuenan ku se siak se Amey nu.”

Ne warà din mekahi diyà te suluhuen te,

“Siaken ke Amey nu,

ne sikuna ke Anak ku.”

⁶Ugaid ne ketà te kedsuhua en dut te Eleteala dut te mekegehem ne Anak din kayi te ampew te dunya ne iyan din migkahi se,

“Sikiyu ne minge suluhuen ku,
ne erapa niyu sikandin.”

⁷Ne iyan nekahi te Eleteala mekeatag dut te suluhuen din se,

“Sikandan se edsuhuen ku
iring te keramag etawa regreg te apuy
se edtuman te kiyug ku.”

⁸Ugaid ne iyan migkahi te Eleteala dut te Anak din mulà se,

“Ke kedadù nu, Eleteala,
ne warà edtemanan din.
Ne ke kedadù nu dut te minge etew nu
ne metidtu rà nevenar.

⁹Su iyan nu kiyug ke metidtu ne ulaula,
ne igkeepesi nu ke ulaula ne meraat.

Tembù be siaken ke Eleteala nu se mibpemili kenikew,
ne imbehey ku keykew ke kehelawan
su mid-edatan ku sikew
muna pà dut te minge ruma nu.”

¹⁰Ne ruen pà duma ne migkahi te Eleteala diyà te Anak din te,

“Pehaney ne sikuna, Kerenan,
se midlimbag kayi te dunya,
ne sikuna red se mibaal te langit.

¹¹Langun ketà ne egkerundus,
ugaid ne sikuna mulà ne warà kegkeparin nu.

Su iring te velegkas ne daan en se kegkerundus dut te langit wey
tanà.

¹²Su iring te kedluklukuna nu te belegkas
se kedluklukuna nu te langit wey tanà
su edsembian nu te vehu.

Ugaid ne sikuna mulà, ne warà kegkeparin nu,
ne ke umur nu ne warà mulà edtemanan din.”

¹³Ne warà suluhuen te Eleteala ne migkehiyan din iring te migkahi rin
dut te Anak din, ke sikandin te,

“Kayi ka pinuu te egkekewanan ku
taman te kenà ku pà ebpenggiekan ke kunterà nu
ne egkevaluy ku sikandan ne ebpemunasan te paa nu.”

¹⁴Su ini se minge suluhuen te Eleteala, ne edsugsuhuen din dà iya
sikandan su ebpetevangen dut te minge etew ne midtelimà dut te umur
ne warà edtemanan din.

**Ebpemineg Kiyu iya rut te Migkahi ni Hisus
Mekeatag te Kebpeliyu Keytew**

2 ¹Ne engketà be te iyan impesabut dut te impayag te Eleteala kenitew ne ke Anak din, ne egawed kiyu te benar dut te impayag kenitew su apey ki kenà egkepeneheewit te kebpekesuwey tew. ²Ke menge suhù te Eleteala ne nebpeneheewit dut te menge suluhuen din diyà te keep-epuan tew ne egkeserihan nevenar, tembù be ke etew ne warà meduma ketà, ne edusaan sikandin te endei se taman ne kevahat te salà ne neveelan din. ³Ne embiya iring ketà, ne iyan pè be kenà muna pà se kedusa te Eleteala keytew embiya kenà ki eduma rut te tudtul mekeatag te mepmeupiya ne ralan te kebpeeliyu te Eleteala rut te menge etew. Su si Hisus en iya ke Kerenan tew se neuna ne nekepenudtul te kebpeeliyu kenitew, ne ke menge etew ne nekerineg kandin se nekepenitihus dan te ini ne benar iya. ⁴Ne impekita rema te Eleteala se benar ini se mibpemenudtul dan kayi te mekegehem ne tuus, menge mekegeyip wey mekeinuinu ne ulaula ne mibpeveelan din kandan. Ne ruma pè ne impekita rin se benar ini su ruen menge ketau dut te Kedesenan ne Ebpetuntul te Menusiya ne imbehey rin diyà te menge mibperetiyaya su migkiyuhan din.

**Mibpeembavà si Hisus ne Mibpebaluy ne Etew ne
Mibpebpatey su imbeliwas din te Langun tew**

⁵Na kenà ke suluhuen te Eleteala se mibpemilì din te kedatù diyà te behu ne dunya keuremà su ini se edlelehan ku kayi. ⁶Ugaid ne iyan din mibpemilì ke menge etew rin ne edatù. Su iring dut te impesurat diyà te Lalag te Eleteala ne ruen migkahi te,

“Na Eleteala, meambe ke edtentenuran nu ke menge etew?
Ne meambe ke igkelilingey nu nevenar se etew rà dè duen?”

⁷Su pehaney ne mibeelan nu sikandan
ne mevavà pà dut te menge suluhuen.
Ugaid ne mehaan dà ini;
su ibpepurù nu en sikandan
te egkereyù wey egkeedatan

⁸su sikandan se ebperetuen nu rut te langun taman.”
Kayi te migkahi te Eleteala ne ebperetuen din ke menge etew dut te langun taman, ne nesebutan tew te warà misan engkey en ne kenà dan ebpekevayàbayà keuremà. Ugaid ne warà pà meuma arà, su taman en guntaani ne warà tew pà mekita ke menge etew ne ebayàbayà te langun taman. ⁹Ugaid ne iyan tew netuenan ne ke kinedatù en ni Hisus, misan mehaan dà ne hewii se kinepeembavà kandin rut te menge suluhuen te Eleteala. Su egenat dut te dekelà ne tavang te Eleteala dut te sikitew ne menge etew, ne mibpebaluy si Hisus ne etew ne mibpebpatey su

imbeliwas din te langun tew ne minge etew. Na guntaani ne sikandin en se egkereyù wey egkeedatan su ke kinekerasey rin te kebpatay rin atag dut te langun ne minge etew.

¹⁰Netahù te itungan din ke Eleteala ne arà se ed-ul-ulaan din su ke Eleteala se midlimbag te langun taman, ne mibeelan din ini su edeyù kandin. Ne metidtu nevenar ke mid-ulaula rin su apey ke merakel ne anak din se ebpekeubpà diyà te kandin ne ebpekeamung dut te kebpurù kandin. Mid-ulaula rin ini dut te kinesuhua rin ki Hisus kayi te ampew te dunya se edresayen su apey rin ibpekita te warà deisek dà ne kurang ni Hisus te kebpekeliyu tew wey apey sikandin se egkevaluy ne egkeunutan tew ne ebpekeewit kenitew te ed-ubpà diyà te Amey rin. ¹¹Eleteala se Amey ni Hisus ne editlak te hinawa te minge etew rut te salà dan, ne Eleteala rema se Amey dut te langun tew ne midtilak en ni Hisus ke salà tew. Tembù be kenà din igkeyeyai sikandin te egkahi te sikitew ne minge suled din. ¹²Su ruen ingkesurat ne migkahi rin dut te Eleteala te,

“Na Eleteala, ebpeketuenan ku rut te minge suled ku mekeatag keykew;
ne ebpemayukbayuk a te kedeyua ku keykew
diyà te kevrunan dan.”

¹³Ne ruen pà ruma ne migkahi rin te,

“Egkeserihan ku te Eleteala.”

Ne ruen pà ne migkahi rin te,

“Ini a ebpekiduma te minge anak te Eleteala
ne insarig din kediey.”

¹⁴Ayan se mid-ingaranan ni Hisus te minge anak te Eleteala ne sikitew red ne etew rà dè duen, tembù be mibpebaluy si Hisus ne etew iring kenitew. Mid-ulaula rin ini su apey rin egketalew ke datù te pekaid ne ed-ingeranan dema ki Setanas. Ne netalew rin sikandin ketà te kinepebpatey rin atag kenitew, su kayi te kinepatey rin ne in-awà din ke gehem dut te datù te pekaid te ed-ewit te minge etew riyà te kepepatey ne warà edtemanan din.

¹⁵Ne kayi te mid-ulaula rin ini ne mibaal sikandin te ralan su apey meawà ke andek te minge etew te kepepatey, su igenat te kegketautau ran ne nengeuripen dan en te andek dan te kepepatey. ¹⁶Engketà be ne mepayag nevenar ne kenà iyan din midtevangan ne minge suluhuen, ugaid ne iyan din midtevangan ne sikitew ke minge inenakan ni Abraham. ¹⁷Tembù be mibpebaluy sikandin ne etew iring dut te sikitew ne minge suled din. Mid-ulaula ini su apey rin egkeherami ke langun ne igkerasey tew apey ebmetau sikandin ne egkeyru kenitew wey apey sikandin se egkevaluy ne mepurù dut te terebpelengesa ne egkedserihan ne ebpeninideg kenitew diyà te etuvangan te Eleteala su apey egkepesahad te Eleteala ke salà tew. ¹⁸Engketà be ne netuenan din en se kedtavang din nevenar dut te minge etew ne ebpenggeraman, su sikandin dema se mibpenggeraman wey midrasey.

Iyan pà Mepurù si Hisus ki Moises

3 ¹Na minge suled ku ne mibperetiyaya en ki Hisus, ne nepemili en dema te Eleteala te egkevaluy ne minge etew rin, ne iyan niyu pegpegitunga ne si Hisus. Su sikandin ke midsuhù te Eleteala kayi te ampew te dunya te ebpesabut mekeatag te kebpekeperetiyaya tew wey apew sikandin ke mepurù te terebpelengesa ne ebpeninindeg kenitew diyà te Eleteala. ²Ne ini te mid-ulaula rin dut te impeheleve kandin te Eleteala, ne mid-up-upianan din se kinetumana rin dut te langun iring ki Moises dengan te mid-up-upianan din se kinetumana rin dut te impeheleve kandin te Eleteala te kinepeneheewita rin dut te minge etew te Eleteala ne ebpekeiring dut te sakup te lusud te valey te Eleteala. ³Ugaid ne iyan pà mepurù si Hisus ki Moises, su iring dut te etew ne ebvaley ne iyan pà sikandin egkevantug, kenà ke imbevaley rin. ⁴Su langun te baley ne ruen mibaal ketà, ugaid ne ke Eleteala ne iyan mibaal te langun taman.

⁵Na misan sugsuhuen dà te Eleteala si Moises, ne mid-up-upianan din se kineruma rin te Eleteala te kinepeneheewita rin dut te minge etew ne ebpekeiring te sakup dut te lusud te valey te Eleteala. Su sikandin se ebpenudtul mekeatag te ibpesabut te Eleteala keuremà. ⁶Ugaid ne si Hisu Kristu, ne sikandin ke Anak te Eleteala ne ebpengemuney dut te valey, ne mid-up-upianan din dema se kinetumana rin dut te langun ne mibpevelan kandin te Amey rin. Ne sikitew ve ke duma ki Hisus, ne ebpekeiring kiyu te sakup te lusud te valey te Eleteala embiya mevaher se kinepretiyaya tew kandin wey kenà kiyu eduwaruwa atag te ebpenerengen tew ne impasad te Eleteala.

Ke Inged ne Ed-imelayan te Kemerehenan ne Impenehana te Eleteala rut te Ebperetiyaya Kandin

⁷Engketà be ne ed-ulaula kiyu te iring te nekahi rut te Kedesenan ne Ebpetuntul te Menusiyà ne egkahi te,

“Na, embiya egkerineg niyu ke Lalag te Eleteala,

⁸dumai niyu ne kenà kew pekeresen te ulu niyu iring dut te keep-epuan niyu ringan ne mid-atu te Eleteala.

Su gewii te riyà dan te tanà ne kenà egkeubpaan te etew, ne migeraman dan ke Eleteala ke edusaan din sikandan dut te salà dan.”

⁹Ne iyan nekahi te Eleteala mekeatag kandan se,

“Misan pà te nekita ran en ke mekegeyip ne ulaula ku lusud te neked-epat nepulù ne rahun,

ne impeiseg den pà lavew
ke kebpengeram dan kedì.

¹⁰ Tembù be neepes a kandan ne migkahi a te,
‘Ini se menge etew ne layun edsuwey ke hinawa ran kedì
ne kenà dan edumaan ke impemandù ku.’

¹¹ Uya, neepes ad iya ne mibpenendan ad te,
‘Kenà dan iya nevenar ebpekelusud
ketà te inged ne ebpekeimeley ran dut te kemerehan
ne ibehey ku perem kandan.’ ”

¹² Engketà be menge suled ku, uram-uram kew nevenar su apey warà
seveka keniyu ne eduma te meraatey ne itungan ne ed-awà se peretiyaya
rin te Eleteala, su arà se kebpekepekeriyù tew rut te Eleteala ne warà
kemetayen din. ¹³ Ugaid ne taman te ruen pà gewii tew te keduma te
Lalag te Eleteala ne tevengaani niyu te ebpeiseg te peretiyaya niyu su
apey kenà ebmeresen te ulu niyu ne kenà kew eduma te Eleteala su
mid-ekalan niyu sikandin dut te salà niyu. ¹⁴ Su embiya egewaran tew te
mevaher ini se sarig tew te behu ki pà mebperetiyaya ki Hisus taman te
ketepusan, ne ebpekeruma ki kandin dut te langun ne imbehey kandin te
Amey rin. ¹⁵ Su ini se impesurat ne Lalag te Eleteala ne egkahi te,

“Na, embiya egkerineg niyu ke lalag te Eleteala,
dumai niyu ne kenà kew pekeresen te ulu niyu
iring dut te keep-epuan niyu rengan
ne mid-atu te Eleteala.”

¹⁶ Ne engkey ve ayan se menge etew ne nekerineg te lalag te Eleteala,
ugaid ne mid-atu kandin? Ew, sikandan ke menge Hudiyanan ne
mibpeneheewit ni Moises te kineawà dan diyà te inged ne Ihiptu rut
te kinepengunguripena kandan. ¹⁷ Ne engkey pè be maa arà se menge
etew ne nepeukan te Eleteala lusud te neked-epat nepulù ne rahun? Ew,
sikandan ke mid-ulaula te meraatey, tembù be midusaan dan te Eleteala
te kinepematey ran diyà te tanà ne kenà egkeubpaan te etew. ¹⁸ Ne
engkey ve arà se menge etew ne midtendan te Eleteala te kenà dan iya
nevenar ebpekelusud ketà te inged ne ebpekeimeley ran ne ibehey rin
perem kandan? Sikandan ded iya ayan se menge etew ne mid-atu kandin.
¹⁹ Engketà be ne netueanan tew se ayan ne menge etew rengan ne warà en
iya mekelusud ketà te inged ne impenehana te Eleteala kandan su warà
dan mebperetiyaya kandin.

4 ¹ Na in-amung ki en rema te Eleteala dut te impasad din te
ebpekelusud dut te inged ne impenehana rin ne ebpeimelayan din
te menge etew rin. Tembù be ed-uram kiyu su apey warà seveka rà ne
egketahak te kedlusud ketà te inged ne ed-imelayan ne impasad din. ² Su
sikitew rema, ne nerineg tew en ke Meupiya ne Tudtul iring dut te keep-
epuan tew rengan. Ugaid ne misan nerineg dan arà, ne warà keupianan

ne netelimà dan su matag dan pemineha ne warà dan peretiyayaa. ³Na sikitew ve mulà se mibperetiyaya en, ne ebpekelusud kiyu en ketà te inged ne egkeimelayan ta ne impasad din. Su ruen migkahi te Eleteala mekeatag te keep-epuan tew rengan, ke sikandin te,

“Neepees ad iya ne mibpenendan ad te,
 ‘Kenà dan iya nevenar ebpekelusud
 ketà te inged ne ebpekeimeley ran dut te kemerehenan
 ne ibehey ku perem kandan!’ ”

Migkahi ini te Eleteala te misan neipus din en te ebpenehana ini se inged ne ebpeimelayan din egenat dut te kinekeipus din te edlimbag kayi te dunya. ⁴Netuenan tew se impenehana rin en ini su ruen impesurat ne lalag din ne egkahi te, “Ketà te ikepitu rin ne hewii ne mid-imeley ke Eleteala su langun ne helevek din ne neipus en.”

⁵Ne misan neandam en ini se inged ne ed-imelayan ne kenà ebpekelusud ke menge etew ne kenà ebperetiyaya su ruen pà maa kayi te Berekat ne Surat ne impesurat din mekeatag te ini se inged ne ed-imelayan ne egkahi te, “Kenà dan nevenar ebpekelusud ketà te inged ne ebpekeimeley ran ne ibehey ku perem kandan.” ⁶Su rengan ne ke neuna ne menge etew ne nekerineg dut te Meupiya ne Tudtul mekeatag ketà te inged ne ebpeimelayan, ne warà dan mekelusud su warà den ma mebperetiyaya. Ugaid ne ruen ded lavew ketà se ebpekelusud te inged ne ebpeimelayan ne impenehana rin. ⁷Su mibehayan pà maa lavew te Eleteala ke menge etew te hewii te kedtelimaa ran dut te impasad din te ke hewii ne ini en. Netuenan ta arà su guna su nekebpipira en nehatus ne rahun se midsahad ketà te hewii ne warà mekelusud ayan se menge etew ne meresen se ulu rin ne ruen impekahi te Eleteala ki David ne egkahi te,

“Na embiya egkerineg niyu ke lalag te Eleteala,
 dumai niyu ne kenà kew pekeresen te ulu niyu.”

⁸Ne kayi te lalag ni David ne netuenan tew te kenà ke meupiya ne inged ne Kanaan ne mibpeneheewitan ni Josue rut te menge Hudiyänen se inged ne ebpeimelayan ne impasad te Eleteala. Su embiya arà en ke ebpeimelayan din ne inged ne nekahi te Eleteala, ne warà din en maa kehiya se duen pà duma ne andew. ⁹Ketà be ne netuenan tew te ruen pà hewii dut te menge etew te Eleteala te kebpekelusud ketà te inged ne ebpeimelayan iring dut te kineimeley te Eleteala ketà te ikepitu rin ne hewii te nekeipus sikandin te kinelimbaha rin te langun taman kayi te dunya. ¹⁰Su langun ne edlusud ketà te inged ne ebpeimelayan ne impasad te Eleteala, ne ed-imeley rema sikandan dut te helevek dan iring dut te kineimeley te Eleteala rut te kinehelevek din te kinelimbaha rin te dunya. ¹¹Engketà be ne ebpenemaran tew su apey kiyu ebpekelusud ketà te inged ne ebpeimelayan ne impasad te Eleteala. Ne ed-uram kiyu su apey kenà kiyu mekeiring dut te menge etew rengan ne warà dan mekelusud su warà dan peretiyayaa ke migkahi te Eleteala kandan.

¹²Ke Lalag te Eleteala ne ebpekeiring te biviyag su mekegehem. Ne lavi pà se keharang te Lalag te Eleteala dut te memeharang ne sundang ne idtibas te etew ne medmeralem se id-uteng din. Ebpekeiring ketà su idtempayar din ke itungan wey ke kiyug dut te menge etew ne ed-eles te hinawa rin. ¹³Su warà misan engkey en ne nelimbag te Eleteala ne ebpekeeles kandin, su langun ne mepmepayag diyà te etuvangan din. Ne ketà te kegkukum din kenitew ne egkepenudtul iya diyà te kandin ke langun ne ned-ulaula tew kayi te ampew te dunya.

Si Hisus se Ebpenindeg Kenitew diyà te Etuvangan te Eleteala

¹⁴Engketà be ne egewaran tew te mevaher ke kebperetiyaya tew ki Hisus ke Anak te Eleteala. Su mibpendiyan en ke Mepurù te Terebpelengesa tew te langit ne riyen en te etuvangan te Eleteala se ebpenindeg kenitew. ¹⁵Ne ini se ebpenindeg kenitew ne nesebutan din se kebmeluvey tew su piya engkey en ne eberangan te kebpenggeram ni Setanas kenitew ne neheraman din en dut te hewii rin pà kayi te ampew te dunya, ugaid ne warà en iya megaga sikandin. ¹⁶Geina ve te sikandin se Mepurù ne Terebpelengesa tew, ne kenà kiyu eduwaruwa te hinawa tew te kebpengeningeni te ked-uvey tew riyà te etuvangan te Eleteala su egkiyuhan din te ebpekita ke limù din kenitew. Su iiruwen sikandin kenitew ne ebpeketavang sikandin dut te kemerehenan tew.

5 ¹Ke etew ne nepemilì ne Mepurù te Terebpelengesa te menge Hudiyenen, ne nepemilì sikandin dut te menge ruma rin ne intendù sikandin ne ebpenindeg te keupianan dut te menge ruma rin diyà te etuvangan te Eleteala. Su sikandin se ebpevetaren dut te ibehey te menge etew riyà te Eleteala wey sikandin se ebpelengesa dut te menge binatang su apey Eleteala se ebpehad dut te salà dan. ²Tehaad te ini se Mepurù te Terebpelengesa ne etew red dema ne melemu ne ebpekedsalà, ne netuenan din se kedtigger te kebpeneheewita rin dut te menge etew ne nekedsalà su warà dan metueni ke tidtu ne ed-ul-ulaan dan. ³Ne tehaad te etew red dema sikandin ne ebpekedsalà ded dema, ne ebpelengesa te binatang te kandin ne salà iring te kebpelengesa rin mekeatag te salà te menge etew.

⁴Warà etew ne ebpekepemilì te kandin ne hinawa te kegkevehayi te ketengdanen ne Mepurù te Terebpelengesa, su Eleteala rà ke ebpekepemilì ketà te etew iring dut te kinepemilia rin ki Arun ke neuna ne Mepurù te Terebpelengesa rengan. ⁵Ne iring din ded be rema ketà si Hisu Kristu su kenà sikandin ke mibpemilì te hinawa rin te kegkevehayi te ketengdanen ne Mepurù te Terebpelengesa. Ugaid ne Eleteala se mibpemilì kandin se egkahi te,

“Sikew ke anak ku,
guntaani ne ebpeketuenan ku se siak se Amey nu,”

ke sikandin.

⁶Ne migkahi rin dema diyà te ruma pà ne minge surat te,
 “Ibpehelevék ku keykew
 se kedterebpelengesa nu taman te taman
 iring dut te kineterebpelengesa
 ni Milkisidik rengan.”

⁷Gewii pà ni Hisus kayi te ampew te dunya ne miguriper se luwà din te kekgulayi din dut te pengeningeni rin diyà te Eleteala, su Eleteala rà se ebpekegaga te kebpeliyu kandin dut te kemetayen din. Ne nerineg ke pengeningeni rin te Eleteala su ke kinepeembavà din te hinawa rin wey ke kebpumaruma rin dut te kiyug te Eleteala. ⁸Su misan Anak en sikandin te Eleteala ne nekepevayà pà sikandin te keresayan ne kayi rin mehuruwi te kebpumaruma rin te Eleteala. ⁹Ne geina te warà misan deisek dà ne igkesawey kandin dut te langun ne mid-ulaula rin, ne sikandin se dait ne ebpebpatay dut te salà te langun ne minge etew su apey langun ne eduma rut te lalag din ne egkevehayan te umur ne warà edtemaninan din. ¹⁰Engketà be ne midtendù en sikandin te Eleteala ne iyan Mepurù te Terebpelengesa ne ebpeninideg kenitew, iring dut te kedterebpelengesa ni Milkisidik rengan te kebpeninideg din.

Ed-uram kiyu su apey kiyu kenà Ebpekesuwey dut te Kebperetiyyaya tew

¹¹Ne ruen pà maa dekelà ne ibpesabut ku perem keniyu mekeatag te kinedterebpelengesa ni Milkisidik wey si Hisus, ugaid ne iyan din kerehenan te kedseysey ku su merehen kew ne ebpekesabut. ¹²Iyan perem dait ne sikiyu se ebmandù dut te minge ruma niyu su neuhet kew en ne mibpemandù, ugaid ne warà kepekayan din. Inemulà se iyan din pà dait ne edseupan kew pà maa te ebpenurù su misan ke neuna ne penurù mekeatag te Eleteala ne kenà niyu pà egkesebutan. Iring kew te minge vatà ne kemulu pà ne edsusu su kenà pà egkepakey ne egkaan te mekehal. ¹³Ne ke etew ne ebpekeiring te vatà ne edsusu pà ne kenà pà ebpekekaan te mekehal, ne kenà din pà egketuenan te kebpsusun dut te meraat wey meupiya ne ulaula. ¹⁴Ugaid ke etew ne nekekaan en te mekehal ne ke etew ne midsukud en ne midtua en se itungan din, su netuanan din en te kebpsusuna rin dut te meraat wey meupiya ne ed-ul-ulaan din.

6 ¹Engketà be arà ne kenà kiyu ed-ulit-ulit dut te melemu rà ne penurù mekeatag ki Hisu Kristu ne nehuruwan ta en pehaney su apey ki ebpekeiseg te eguru rut te metua ne penurù ne edait dut te metua en ne etew. Su warà keupianan ne egketelimà tew embiya iyan tew rà ed-ul-ulitan ke neuna ne penurù mekeatag dut te kebpsendit wey ke kebperetiyyaya te Eleteala ²wey ke penurù mekeatag te kebpibunyag wey ke kedampen te purù te etew te ibpengeningeni ran sikandin, su ini ne

penurù ne netuenan ta en. Ne netuenan ta en dema ke penurù mekeatag te kebanew te Eleteala keyta wey ke penurù mekeatag te kegkukum din kenitew ne ke ebpetemanan din kenitew ne kenà egkesembian taman te taman. ³Ketà be ne iyan tumù se ed-iseg ki se eguru rut te ruma ne penurù mekeatag ki Hisus apew ebpekeiseg pà ke peretiyaya tew. Ne ed-ulaan tew ini embiya idluhut te Eleteala.

⁴Su ke minge etew ne nesebutan dan en nevenar ke Meupiya ne Tudtul ne nerayahan en ke itungan dan te Eleteala, ne neheraman dan en ke meupiya ne tavang ne imbehey kandan te Eleteala wey ke gehem dut te Kedesenan ne Ebpetuntul te Menusiyà ugaid ne mid-engked dan en te kebperetiyaya ran, ne kenà en egkepakey ne edsaup dan en maa ebpedsendit. ⁵Su embiya neheraman dan en nevenar ke keupiya dut te lalag te Eleteala, ne neheraman dan en dema ke gehem te Eleteala iring dut te ibpayag din ketà te ketepusan ne hewii ⁶ugaid ne ed-iniyuhan dan en maa ke Eleteala wey ke langun ne neheraman dan, ne kenà en egkepakey ne edsaup dan en maa ebpedsendit. Su embiya mid-iniyuhan dan en ke kebperetiyaya ran ki Hisus, ne iring te impelansang dan en maa ke Anak te Eleteala diyà te pinebelavag ne kayu ne mibpegkayà dan sikandin diyà te etuvangan te merakel ne etew.

⁷Ne langun tew ne minge etew ne ebpekeiring te tanà. Igkeupiani te Eleteala ke tanà ne edsenepan te uran ne ebmeames-ames ne meselinuvù te pinemula rin. Meupiya ke tanà ne iring ketà su ebpekegkeupiya rut te kemuney ketà. ⁸Ugaid ne embiya iyan dà edtuvù se ilemunen wey ruhiyen ne sagbet, ne warà pantag din arà se tanà. Arà be ne edereetan te Eleteala su ebinsulan din iring dut te ibped-ulaula rin te etew ne mid-iniyug se peretiyaya rin te Eleteala.

⁹Na minge suled ku ne igkelimù ku, ne misan pà te iring kayi se minge lalag ku keniyu ne netuenan ku te kenà iring ketà se ibped-ulaula keniyu. Su netuenan ku ne ebpeketuntul kew red dut te ralan te kebpekeperetiyaya te Eleteala, tembù be iyan ibehey keniyu ne meupiya. ¹⁰Su ke ulaula te Eleteala ne metidtu, tembù be kenà din egkelipatan ke meupiya ne ulaula niyu wey ke limù niyu kandin ne impekita niyu rut te kedtevang niyu rut te minge ruma niyu ne mibperetiyaya taman guntaan. ¹¹Ne iyan ku kiyug ne langun niyu ne ebpenamar te ed-ulaula kayi se taman te kedlived ni Hisus su apew niyu egketelimà ke ebpenerengen niyu riyà te Eleteala. ¹²Tembù be kenà kew ebpepepehul te keduma niyu te Eleteala, ugaid ne iringi niyu ke ulaula te minge etew ne mevaher se sarig dan te kedtehad dan dut te impasad te Eleteala kandan.

Ke Impasad te Eleteala ne Edtumanen Din Nevenar

¹³Na iyan niyu tentenuri ne si Abraham. Su rengan ne ruen impasad te Eleteala kandin, ne kiyug din ne egketuenan ni Abraham se egketuman

ini se impasad din. Tembù be ruen impenendan din te mevaher. Ne geina te warè en mepurù kandin, ne ini se kinepenendan din ne impepevayà din dut te kandin ne ngaran. ¹⁴Migkahi rin ki Abraham te,

“Idtarew ku kenikew
te ebpeneuven ku nevenar sikew
ne ebpekerekelen ku
ke minge inenakan nu.”

¹⁵Ne warà medtakas si Abraham te kedtihad din dut te impasad te Eleteala kandin, tembù be netelimà din ke langun ne impasad te Eleteala kandin.

¹⁶Na, embiya ruen etew ne egkiyug ne egketueanan din te egketuman iya arà se impenendan din, ne ini se impenendan din ne ibpepevayà din dut te ngaran te etew ne mepurù pà kandin. Ne embiya iring ketà se ulaula te etew ne ebpenendan, ne egkeperetiyaya te ruma ne etew ne metidtu ini se pasad din ne ketà be ne warè en ebpeep-epuley. ¹⁷Iring ketà se mid-ulaula te Eleteala. Su kiyug din ne egketueanan te langun ne minge etew te kenà din edsembian ke itungan din mekeatag dut te impasad din kandan, tembù be impenendan din ini impepevayà te kandin ne ngaran. ¹⁸Engketà be arà ne ruen deruwa ne ulaula te Eleteala ne kenà egkesembian te misan engkey en. Seveka ne ke impasad te Eleteala kenitew, ne ke ikeruwa ne impenendan din se kedtumana rin ketà impepevayà te ngaran din. Ne kayi te ini se deruwa ne mid-ulaula rin, ne netueanan tew te kenà din edsembian ke migkahi rin su ke Eleteala ne kenà teruen. Tembù be sikitew ne nekeaput en kandin, ne kenà meduwaruwa se itungan tew te kedtelimà tew rut te ebpenerengen tew kandin. ¹⁹Ini se ebpenerengen tew ne impasad te Eleteala kenitew se mevaher ne ebpeunsaran su apey ki kenà ebpekesuwey su edtuman ini nevenar. Uya, edtumanen iya te Eleteala ini su diyan en si Hisus te etuvangan din ne ebpeninindeg keytew. ²⁰Mid-una sikandin kenitew riyà su edtavang kenitew. Nevaluy sikandin ke Mepurù ne Terebpelengesa ne ebpeninindeg kenitew taman te taman diyà te etuvangan te Eleteala iring dut te kineterebpelengesa ni Milkisidik dengan.

Ini ne Mekeatag ki Milkisidik Rengan

7 ¹Si Milkisidik ini ne ratù sikandin dengan diyà te inged ne Salim, ne terebpelengesa rema sikandin ne ebpeninindeg te minge etew rut te Eleteala ne warà repeng te kinemepurù din. Ne ketà ne hewii te kineuli ni Abraham te ebpekibunù dut te minge kunterà din ne epat ne retuan ne nengepatey rin, ne midsinuhung sikandin ni Milkisidik ne impengeningeni rin sikandin te ebpeneuven te Eleteala. ²Ne si Abraham ne imbehey rin ki Milkisidik ke ikesepulù ne umun dut te langun ne netavan din te kinebunuey rin. Ne iyan din meana kayi te ngaran ni

Milkisidik ne “Datù te Metidtu se Ulaula Rin.” Ne geina te ratù dema sikandin te inged ne Salim, ne neingaranan ded sikandin te “Datù te Kerinew” su iyan meana te Salim ne kerinew. ³Ne diyà te Lalag te Eleteala ne impesurat din ne warà lalag mekeatag te amey ni Milkisidik etawa ke iney rin etawa ke menge keep-epuan din. Ne warà mekesurat dema mekeatag te kineanaka kandin etawa ke kinepatey rin. Tembù be iring te warà rudsuan din wey warà ketepusan din. Ne ebpekeiring sikandin te Anak te Eleteala ne warà ketepusan se kedterebpelengesa rin.

⁴Ne ketà be ne netuenan ta se kepurù ni Milkisidik su misan si Abraham ini se mevantug ne keep-epuan te sikami ne Hudiyanen ne mibehey ki Milkisidik te ikeseputù ne umun dut te langun ne netavan din te kinebunuey rin. ⁵Ne ini se terebpelengesa te Hudiyanen ne menge inenakan ni Levi wey menge inenakan dema ni Abraham. Ne insuhù kandan dut te penduan ni Moises ne egkevehayan dan te ikeseputù ne umun dut te nesabpet te menge ruma ran ne Hudiyanen misan sikandan ke menge inenakan ded ni Abraham. ⁶Ne si Milkisidik ne kenà inenakan mulà ni Levi, ugaid ne misan iring ketà ne mibehayan ni Abraham sikandin te ikeseputù ne umun dut te netavan din. Ne ruen ruma pà ne ibpekita te kepurù ni Milkisidik su misan ruen en impasad ki Abraham te Eleteala, ne impengeningeni pà sikandin ni Milkisidik te ebpeneuven te Eleteala. ⁷Ne netuenan ta ne ke etew ne ebpengeningeni te egkepenaub ne ruma rin ne iyan pà mepurù dut te etew ne ibpengeningeni rin te egkepenaub. ⁸Ne ruma pà, ne mepurù pà si Milkisidik dut te menge terebpelengesa ne inenakan ni Levi ne midtelimà dut te ikeseputù ne umun, su minatey red sikandan su etew rè ma rema sikandan. Ugaid ne si Milkisidik ke midtelimà dut te ikeseputù ne umun ne imbehey ni Abraham, ne iring te viviyag ded lavew sikandin su warà ingkesurat dut te Lalag te Eleteala mekeatag te kemetayen din. ⁹⁻¹⁰Ne misan si Levi ne mepurù ne etew su sikandin se puunan dut te langun ne menge terebpelengesa te menge Hudiyanen ne iyan nevehayan dut te ikeseputù ne umun te menge ruma rin, ne mepurù pà si Milkisidik kandin. Su ketà te kinesinuhunga ki Abraham ni Milkisidik ne imbehey en ni Abraham kandin ke ikeseputù ne umun dut te netavan din, ne iring te nekeamung si Levi ki Abraham te ebehey misan warà pà ianak sikandin su diyà pà sikandin te lawa ni Abraham ke apù din.

Kenà Ebpekegaga ke Kinedterebpelengesa dut te Inenakan ni Levi te Ebpeliyu te Menge Etew dut te Salà dan, tembù be Midsuhù te Eleteala ke Anak din si Hisus ne Terebpelengesa tew ne Ebpeninindeg Kenitew diyà te Etuvangan Din

¹¹Ne netuenan ta te rutun te kinevehey te Eleteala te penduan din diyà te menge Hudiyanen, ne ke menge inenakan ni Levi se midtendù din ne

menge terebpelengesa se ebpetumanen dut te penduan, ne si Arun se neuna ne terebpelengesa. Ne embiya nekegaga dut te kinedterebpelengesa ran te ebpeleyu ke menge etew rut te salà dan su apey ki ebpekeuvey te Eleteala, ne warà en atag din te ruen pà maa ebpelepawen ne senge bias ne terebpelengesa ne kenà iring te kinedterebpelengesa ni Arun. Ugaid ne tehaad te kurang en se kinedterebpelengesa ni Arun, tembù be midsuhù te Eleteala ke terebpelengesa tew ne senge bias su iring en te kinedterebpelengesa ni Milkisidik, ne kenà si Arun. ¹²Ne geina te nesembian te Eleteala ini se kinedterebpelengesa ne ebpenindeg dut te menge Hudiyänen, ne ke penduan ne ibpetuman din kandan ne egkesembian ded dema. ^{13,14}Ne netuenan ta te nesembian ini se edterebpelengesa su si Hisu Kristu ke Kerenan tew ini se edlelehan ku kayi ne kenà riyà ebpuun te inenakan ni Levi su senge bias en. Su riyà ebpuun sikandin te inenakan ni Huda, ne warà inenakan ni Huda ne nevaluy ne terebpelengesa ke kenà si Hisus dà. Ne warà iya kehiya ni Moises ketà te lalag din mekeatag te kedterebpelengesa te ruen riyà ebpuun.

¹⁵Ne mepayag en nevenar te tehaad te nesembian te Eleteala ke menge terebpelengesa ne inenakan ni Levi, ne nesembian din dema ke penduan su nepemilì din se senge bias ne terebpelengesa ne iring dut te kedterebpelengesa ni Milkisidik. ¹⁶Ne ketà te nepemilì te Eleteala si Hisus ne terebpelengesa ne ebpenindeg kenitew, ne warà din dumai ke penduan te menge Hudiyänen ne kayi rà ebpekepuun te inenakan ni Levi ke terebpelengesa. Ugaid ne mibpemilì din sikandin su atag dut te gehem te umur din ne warà edtemanen din. ¹⁷Su ruen impesurat ne Lalag te Eleteala mekeatag kandin ne egkahi te,

“Sikew ke terebpelengesa ne ebpenindeg te menge etew kayi te kedì taman te taman, iring dut te kinedterebpelengesa ni Milkisidik dengan.”

¹⁸Ne egenat ketà ne netuenan ta te midsembian en te Eleteala ke raan ne penduan ne intahak ki Moises su meluvey, ne warà gehem din te edtavang. ¹⁹Su ke keduma dut te menge etew te penduan ne kenà ebpekegaga te ebmetidtu ke menge etew su apey ran ebpekeuvey te Eleteala. Ugaid ne guntaani te si Hisu Kristu en se insambì dut te raan ne penduan, ne ruen mepmeupiya pà ne ebpenerengen tew su ruen en ralan te kebpekeuvey tew te Eleteala.

²⁰⁻²¹Ne kenà ketà dà taman se keupiya te kinepekesambì ni Hisus ne terebpelengesa, su ketà te kinpemilì te Eleteala ki Hisus ne terebpelengesa ne ruen impenendan din ki Hisus se egkahi te,

“Siak ke Eleteala ne ibpenendan ku sikew te sikuna ke terebpelengesa ne ebpenindeg te menge etew kayi te kedì taman te taman.

Ne ini se itungan ku
ne kenà en iya egkesembian.”

Ugaid ne pehaney te iyan midtendù te Eleteala ne ke inenakan ni Levi se menge terebpepengesa, ne warà impenendan din mekeatag kandan. ²²Ne kayi te kinepenendan te Eleteala mekeatag te kedterebpepengesa ni Hisus, ne netuenan ta te ini se behu ne ralan te kebpekeuvey ta te Eleteala ne impasad din ne meupiya pà dut te raan ne penduan ne intahak din ki Moises, su si Hisus ke tuus te ini se behu ne pasad ne egketuman en.

²³Ne kenà dutun dà taman se kinebira rin dut te kinedterebpepengesa te menge inenakan ni Levi wey ke kedterebpepengesa ni Hisus su ini se menge terebpepengesa ne inenakan ni Levi ne merakel dan su embiya ruen ebpatay kandan ne egkesembian dut te ruma, su ke kinedterebpepengesa ran ne ruen tedtab din. ²⁴Ugaid ne ke kedterebpepengesa ni Hisus ne warà mulà ketepusan din. Warà kegkesembii rin su ke umur din ne warà ketepusan din. ²⁵Tembù be ebpekegaga nevenar si Hisus te ebpeleyu te langun ne ed-uvey te Eleteala su ebuyù te tavang su atag dut te sarig dan kandin, su warà ma ketepusan din se kebuyù din te tavang kenitew riyà te Eleteala.

²⁶Engketà be ne si Hisus ke Mepurù ne Terebpepengesa tew riyà te etuvangan te Eleteala ne sikandin se ebpekevehey kenitew te langun ne kurang tew. Metidtu nevenar sikandin, ne warà salà din misan deisek dà ne meraat ne ulaula. Nekebira nevenar sikandin dut te langun tew su belisalà ki. Ne impepurù sikandin te Eleteala dut te langun taman misan diyà te langit. ²⁷Ne kenà iring sikandin dut te neuna ne menge terebpepengesa su ruen menge binatang ne ibpelengesa ran te uman gewii, ne ed-unaan dan pà te ebpepengesa ke ibehey ran te Eleteala su apey ke salà dan ne egkepesehad, ne arà pà ne ruen ibpelengesa ran mekeatag te salà te ruma ran. Ugaid ne si Hisus ne warà salà din, tembù be seveka rà se impelengesa rin te iyan din imbehey ke kandin en ne hinawa te ebpepatay su apey ke langun ne salà te menge etew ne egkepesehad.

²⁸Ketà te miduma red ke menge etew rut te penduan ne intahak ki Moises dengan, ne ke menge ruma ran ne mekesesalà iring ded kenitew se nevaluy ne terebpepengesa ne ebpeninideg kandan diyà te Eleteala. Neuhet pà dutun ne nesembian te Eleteala ke penduan, ne impenendan din se ebpemilien din ke Anak din te sikandin ke terebpepengesa tew ne ebpeninideg kenitew. Su ke Anak din, ne ke ketidtu rin ne warà kurang din taman te taman su midtuman din en langun.

**Ini ne Mekeatag te si Hisus en ke Mepurù ne Terebpepengesa
tew ne tuus te ruen behu ne Pasad te Eleteala Kenitew**

8 ¹Iyan meana kayi rut te langun ne migkahi ku ne ruen en Mepurù ne Terebpepengesa tew ne ebpeninideg kenitew diyà te Eleteala. Ne

diyan en sikandin ebpinpinuu te dapit te egkekewanan te Eleteala diyà te langit. ²Edtumanen din ini se kebmeperù din te kedterebpelengesa rin diyà te etuvangan te Eleteala diyà te Punggus ne Berekat ne Ruhù diyà te baley ne mibeelan ne ebpengeningeniyàn te Eleteala. Ne kenà etew se mibaal kayi ugaid ne Eleteala ke Kerenan tew.

³Ne langun ne minge Mepurù te Terebpelengesa ne ebpenindeg dut te minge etew diyà te Eleteala ne netendù sikandan te ebehey dut te ibpelengesa ne minge binatang wey ke ruma pà ne ibehey te minge etew riyà te Eleteala. Ne iring din ded dema si Hisus ke Mepurù ne Terebpelengesa tew, su ruen ded dema ibpekevehey rin diyà te Eleteala. ⁴Ne sikandin ke Mepurù ne Terebpelengesa tew riyà te langit, ugaid ne embiya kayi pà sikandin te ampew te dunya ne kenà egkedterebpelengesa sikandin su kenà sikandin inenakan ni Levi ne igenat dā te ruen terebpelengesa ne sikandan se ebehey te Eleteala te edumaan dan ke suhù te penduan ne intahak ki Moises rangen. ⁵Ugaid ne ke helevek dan te terebpelengesa kayi te ampew te dunya ne iyan din iring ne alung dā wey limbahan dā dut te tidtu ne ed-ul-ulaan diyà te langit. Duen dema baley ne ebpengeningeniyàn dan te terebpelengesa ne alung dā dema dut te benar ne diyà te langit. Su ruen migkahi te Eleteala ki Moises te kebpeitindeg din en ketà, ke sikandin te, “Dumai nu nevenar ke langun ne imekita ku keykew te riyà ki te buvungan.”

⁶Ugaid ne ini se helevek ni Hisus te kedterebpelengesa ne mepurù pà dut te nengehelevek te minge terebpelengesa rangen. Ne iring din ded dema ke keupiya ini se behu ne pasad te Eleteala te si Hisus se terebpelengesa tew ne ebpenindeg kenitew su muna pà se keupiya rin ketà te neuna ne pasad te Eleteala. Iyan din ked-una te keupiya ini se behu ne pasad su ruen impenendan din mekeatag ketà ne mepmeupiya pà nevenar.

⁷Su embiya ke neuna ne pasad te Eleteala ne ebpekegaga, ne kenà din en edsembian te behu. ⁸Ugaid ne nekita te Eleteala te midsurang ke minge etew dut te suhù te penduan ne intahak ki Moises. Tembù be midsewayan din sikandan te egkahi te,

“Ruen hewii ne ebpekeuma ne ebeelan ku ke behu ne pasad dut te minge etew ne inenakan ni Israyil wey ke minge etew ne inenakan ni Huda.

⁹Ne kenà iring ini dut te neuna ne pasad ku riyà te minge keep-epuan dan dengan te kinetevangi ku kandan te ed-awà dut te inged ne Ihiptu, su warà dan tumana ke neuna ne impasad ku kandan, tembù be mid-ewaan ku sikandan.

10 Ugaid ne ini se behu ne pasad ku
ne ebeelan ku keuremà dut te minge inenakan ni Israyil,
ne ibpetahù ku ini se suhù ku te itungan dan
ne ibpesurat ku ini te hinawa ran
su apey ran egkerumai egenat te hinawa ran.
Ne ketà be ne siak ke Eleteala ne edtewehan dan,
ne sikandan ke minge etew ku.

11 Su ketà be ne hewii ne kenà en ebpegingewaan
te ebpenuruen den pà ke minge ruma ran mekeatag kediey.
Su langun dan egenat te kevevaan taman te kepuruan
ne egketau en kediey.

12 Ne ebpeseharen ku sikandan,
ne kenà ku en ebpenunduhen ke meraat ne ulaula ran.”

13 Ne ketà te impesabut en te Eleteala te ruen en behu ne pasad din, ne
nesebutan tew en te nesembian din en arà se raan ne penduan su neipus
en. Ne embiya ke raan ne nesembian en, ne egkeawà en su warà en
pantag din.

**Iyan Dan Mid-ulaula te Eduma Rut te Neuna ne Pasad Te
Eleteala diyà te Baley ne Ebpengerapan te minge Hudiyanen**

9 ¹ Ketà te neuna ne pasad ne mibeelan te Eleteala dut te minge etew
ne ruen minge suhù mekeatag te dait ne ed-ul-ulaan dut te minge
Hudiyanen te kebpengarap kandin. Ne ruen dema baley ne mibpeveelan
te Eleteala te minge etew ne ebpengerapan dan kandin. ² Impeitindeg
dan ke valey ne ebpengerapan ne lundis te binatang, ne deruwa se
ruhu rin. Ne ke neuna ne ruhu ne edlusud dan ketà ne ed-ingeran
te Berekat ne Ruhu. Ne ketà ne ruen intahù ne sulù wey lemisaan ne
edtehuan dan te pan ne ibehey riyà te Eleteala. ³ Ne ruen mekepal ne
sapat ne impehelet dut te ikeruwa ne ruhu. Ne ini se ikeruwa ne ruhu ne
ed-ingaranan te Punggus ne Berekat ne Ruhu. ⁴ Ne iyan intahù ketà ne
lemisaan ne vulawan ne edtutungan dan te rukut. Ne ruen dema ketà ne
iring te kavan ne midsepuwan te bulawan ne midtehuan dut te deruwa
ne melumpayà ne vatu ne midsuratan te penduan ne imbehey ki Moises
te Eleteala. Ne ruen ketà dema ke bulawan ne kelalew ne netehuan
te egkeenen ne ed-ingaranan te mana ne imbehey kandan te Eleteala
rengan. Ne rutun dema neketahù ke tuked ni Arun ne mibpeneringsing
te dawun. ⁵ Diyà te divavew te kavan ne ruen deruwa ne ledawan ne
iring dut te paras te suluhuen ne neverat se pakpak dan ne tuus te ketà
ke Eleteala. Neverat en ke pakpak dan su ed-elungan dan ke divavew te
kavan su riyà ibpirik ke lengesa dut te impelengesa su apey egkepesehad
ke salà dut te minge etew. Ugaid ne kayi ku rà edtemana ini su kenà pà
ini timpu te edseysey.

⁶Ne arà be ke kinepedtandang dut te langun diyà te baley ne ed-erapan. Ne edlusud ke menge terebpelengesa dut te neuna ne ruhu te uman gewii su edtumanan dan ke impehelevek kandan te Eleteala. ⁷Ugaid ne ke ikeruwa ne ruhu ne iyan dà ebpekelusud ketà ne ke Mepurù ne Terebpelengesa, ne keseveka rin dà ed-ul-ulaa ini te uman rahun. Ne kenà egkepakey ne ebpekelusud sikandin ketà embiya kenà ed-ewit te lengesa rut te impelengesa ne ibehey riyà te Eleteala su atag dut te salà din wey ke salà dut te menge etew ke embiya ruen mid-ulaula ran ne warà dan metueni ne salà. ⁸Ne igenat ketà ne ruen ibpesabut kenitew dut te Kedesenan ne Ebpetuntul te Menusiyà te ketà ebpuun te mekepal ne saput ne impehelet dut te Punggus ne Berekat ne Ruhu. Iyan din ibpesabut kenitew ne gewii te ruen pà suhù mekeatag dut te neuna ne ruhu ne edtumanan dan pà, ne warà pà mekeuma ke hewii ne egkepakey ne edlusud ke menge etew ketà te ruhu ne rutun en ke Eleteala. ⁹Ne idledawan arà se ibpenurù kenita te misan ruen pipira ne ibpelengesa ne binatang wey ruma pà ne ibehey ran te Eleteala, ne kenà ini ke ebpekeawà dut te salà te menge etew ne ebpengeningeni ketà. ¹⁰Su ini, ne miduma ran dà te menge penduan mekatag te betasan te kegkaan, ked-inum wey ke mid-ulaula ran te ebmelinis ke lawa ran te warà dan pà mekeuvey te Eleteala. Su langun kayi ne suhù ne idlinis dà dut te lawa ran, ugaid ne kenà egkegaga te edilak ke hinawa ran. Ne langun kayi ne ruen egkeetahan din se taman dà ketà te hewii ne edsembian te Eleteala ke behu ne ralan.

¹¹Na guntaan te ruen en ini se behu ne ralan su nekeuma en si Hisu Kristu ne sikandin en ke Mepurù ne Terebpelengesa tew, ne ibpepeveyà kandin ne muna pà se keupianan ne nekeuma kayi te kenitew. Su ke ebpengerapan ne midlusuran din te egelevek te ebpeninindeg kenitew, ne muna pà se keupiya rin su kenà baley ne mibeelan te etew su kenà kayi rà te ampew te dunya. ¹²Ne ketà te midlusud si Hisu diyà te Punggus ne Berekat ne Ruhu ne dutun en ke Eleteala, ne keseveka rà mulà medlusud sikandin. Ne kenà iyan din mid-ewit ke lengesa te kambing etawa sapi. Ugaid ne iyan din mid-ewit ne ke kandin ne muney ne lengesa su ke kinepatey rin se nekepeliyu kenitew dut te kedusa te salà tew taman te taman. ¹³Su ke lengesa dut te kambing wey sapi wey ke ibmuk dut te midtutung ne nati ne sapi ne nekebira se atag din. Su nekahi te penduan se embiya ruen etew ne midsinggur dut te etew ne minatey, ne ke terebpelengesa se ebpirik kandin dut te lengesa etawa edsawed kandin te ibmuk dut te midtutung ne nati ne sapi su apey egkeawà ke keredsik din apey sikandin ebpekeuvey te Eleteala. ¹⁴Engketà be ne embiya ebpekegaga ne ed-awà te meredsik te etew arà se lengesa rà te menge binatang, ne iyan pè be kenà muna pà se kebpekegaga rin ini se lengesa en ni Hisu Kristu te kebpeeliyu rin kenitew rut te salà tew. Su

egenat te tavang te Kedeseenan ne Ebpetuntul te Menusiyà, ne imbehey ni Hisus ke hinawa rin ne ebpebpatey misan warà deisek dà ne salà din su ini ke ibehey rin te Eleteala. Ne ini se lengesa rin se edlinis kenitew apew ki edsangur te Eleteala ne warà kemetayan din. Tembù be kenà en ebpegingewaan te edumaan ta ke iring dut te minge Hudiyanen ne kenà ebpekegaga te ebpeuvey kenitew te Eleteala.

¹⁵Ne tehaad te ruen gaga te lengesa ni Hisus iring ketà, ne sikandin ke ebpenininteg kenitew riyà te Eleteala su edtuman dut te behu ne pasad su apew ke langun ne minge etew ne midtawag te Eleteala ne ebpeketelimà dut te penaub ne impasad din ne warà edtemanin din. Ne egketelimà ini sabap dut te kinepatey ni Hisu Kristu ne nekepeliyu kandan dut te salà ne neveelan dan gewii te kineruma ran te neuna ne pasad.

¹⁶Upama ke ruen etew ne ruen kearen din ne idalem te epidavit ke engkey se egkevehayan te kearen din embiya ebpatay en sikandin. Ugaid ne taman te biviyag pà sikandin ne kenà egkepenelipun ini rut te minge etew ne ebhayan dut te kearen din, su kenà egkepakey ne ebpenelipunen dan ini se taman ne ruen tuus te minatey en ini se kemuney. ¹⁷Su ini se epidavit, ne warà igkevehey rin taman ne biviyag pà ke kemuney te kearen. Iyan din kebpekevehey ke minatey en ke kemuney te kearen. ¹⁸Ne iring din ded dema ke neuna ne pasad te Eleteala, su iyan din ingawà ne ruen lengesa rut te mibpeimetayen su apew ebpekeipanew en ke pasad te Eleteala. ¹⁹Ne arà se mid-ulaula ni Moises rengan. Pehaney ne mibpesabut din te minge etew ke langun ne penduan ne imbehey kandan te Eleteala. Arà pà ne migkuwa rin ke lengesa te minge nati ne sapi wey minge kambing ne impelengesa ne mid-emuan din ini te wayig. Na migkuwa rin ke tangkey te pinemula ne ed-ingaranan te hisup ne ruen bulvul te bilibili ne midtinà te merihà ne mibegkesan ketà, ne in-ered din ini ketà te lengesa ne impirik din dut te riberù ne midsuratan te penduan ne impirik din dema dut te minge etew. ²⁰Ne gewii rin te ebpemirik ne egkahi sikandin te, “Tuus ini se lengesa te behu ne pasad ne mibeelan te Eleteala keytew apew kiyu rin egketelimà, ne insuhù din ne edumaan tew kayi te nekahi rin.” ²¹Ne iring din ded dema ne mibpemirikan ni Moises ke baley ne ebpengerapan wey ke langun ne kesengkapan ketà te kebpgarang. ²²Su nekahi te penduan ne timalù te langun ketà ne iyan pegingawà ne egketilak dut te lengesa. Ne iring din ded dema ne kenà egkepesehad ke salà te minge etew embiya kenà duen ibpelengesa.

²³Ini se ebpengerapan te minge Hudiyanen ne mibeelan te etew kayi te dunya wey ke langun ne neketahù ketà ne ebpekeiring dà ini dut te tidtu ne ebpengerapan diyà te langit, ne iyan pegingawà ne ini ne egketilak dut te lengesa te binatang. Ugaid ne ke tidtu ne ebpengerapan diyà te langit ne iyan pegingawà ne mepmepiya pà ne ibpelengesa ketà.

²⁴Su si Hisu Kristu ne kenà ke valey ne ebpengerapan ne mibeelan dà te etew kayi te ampew te dunya se midlusuran din su ini ne ebpekeiring dà dut te ke tidtu riyà te langit. Ugaid ne sikandin ne midlusud diyà te langit ke tidtu ne ed-ubpaan te Eleteala, ne diyan en guntaan sikandin te etuvangan te Eleteala se ebpeninideg kenitew. ²⁵Ne ke Mepurù te Terebpelengesa te Hudiyanen ne uman rahun ne edlusud sikandin te Punggus ne Berekat ne Ruhu ketà te baley ne ebpengerapan kayi te ampew te dunya su ibehey rin ke lengesa rut te binatang ne impelengesa. Ugaid ne si Hisu Kristu mulà ne warà din isaupsaup te ebehey ke lengesa rin te Eleteala su keseveka rà iya. ²⁶Su embiya uman en rahun ne ebehey sikandin te lengesa rin, ne utew merakel se keresayan din te kebpebpathey rin te igenat dà dut te kinelimbaha kayi te dunya taman guntaan. Ugaid ne kenà iring ketà se mid-ulaula rin, su keseveka rà se kinepengkayì rin ne ini en ke telanged ne hewii ne midtendù te Eleteala. Nevaluy sikandin ne etew ne imbehey rin ke hinawa rin te ebpebpathey su apey egkeawà ke salà dut te langun ne menge etew. ²⁷Ne langun tew ne menge etew ne keseveka rà ebpathey, ne an pà ne egkukumen kiyu te Eleteala. ²⁸Ne iring ketà ne keseveka rà imbehey ni Hisus ke hinawa rin te ebpebpathey su apey ke salà dut te langun ne menge etew ne egkeawà. Ne edlived pà maa kayi te ampew te dunya, ugaid ne kenà maa edsaup ebpebpathey te salà tew. Inemulà te ed-egayen din ke sikitew ne edtahad kandin.

Ke Rekelà ne Mid-ulaula ni Hisu Kristu su apey ki Ebpekeuvey te Eleteala

10 ¹Iyan dan midumaan dut te penduan ne imbehey te Eleteala ki Moises dengan ne alung-alung dà su in-upama rà dut te tidtu ne keupianan ne ebpekeuma. Ne ke tidtu ne keupianan ne nekeuma en kayi te kenitew impepevayà ki Hisus. Su nekahi te penduan ne uman rahun ne iyan pegingawà ne ruen menge binatang ne ibpelengesa ne ibehey riyà te Eleteala su apey egkeawà ke salà dut te menge etew. Ugaid ne misan iring ketà se ed-ul-ulaan dan taman te taman, ne warà mekegaga arà te kebmetidtu te menge etew su apey ran ebpekeuvey te Eleteala. ²Su embiya benar ne ebpeketilak dut te salà dan arà te lengesa te binatang ne ibehey ran te Eleteala, ne warà en atag din te edsaupsaup dan te uman rahun su ebmelilintad en perem ke hinawa ran dut te salà dan ne nepesehad en. ³Inemulà te arà se lengesa ne ibehey ran te Eleteala te uman rahun ne ke kebpetenuri rà kandan te salà ne neveelan dan. ⁴Su ke lengesa te menge sapi wey kambing ne warà nevenar kebpekegaga rin ne ed-awà dut te salà dan.

⁵Tembù be guna su mehaan en ebpengkayì si Hisu Kristu te ampew te dunya ne migkehiyan din ke Amey rin ne Eleteala te,

“Kenà nu iyan egkiyuhan

ke minge binatang ne impelengesa
 wey ke ruma pà ne ibehey ran keykew;
 ugaid ne iyan nu kiyug
 ne egkevaluy a ne etew,
 tembù be impenehana nu en ke lawa ku.

- 6 Uya, kenà nu igkesuati
 ke minge binatang ne edtutungen,
 wey ke lengesa ne ibehey ran keykew
 te id-awà dut te salà dan.
- 7 Engketà be arà ne egkehiyen ku te,
 ‘Ini ad, Eleteala, te edtuman dut te kiyug nu
 iring dut te nekahi
 ne impesurat nu mekeatag kediey.’ ”

8 Mid-unaan ni Hisus te egkahi te kenà ke minge binatang ne ibpelengesa ran wey ke ruma pà ne ibehey ran te Eleteala ne ebpekesuhat te hinawa rin. Ne kenà din ded dema igkesuat ke minge binatang ne edtutungen wey ke lengesa ne ibehey ran kandin te igkeawà dut te minge salà dan. Ne migkahi rin ini misan netueanan din en te langun ne ibehey ran su atag dut te edumaan dan ke nekahi te penduan ni Moises. 9 Ne midtunduhan din en maa te edlalag te, “Ini ad, Eleteala, te edtuman dut te kiyug nu.” Ne arà te lalag ni Hisus ne netueanan tew en te in-awà en te Eleteala ke neuna ne pasad din mekeatag te kebehey kandin te minge binatang ne ibpelengesa su midsembian din en te behu su ke kinepelengesa ni Hisu Kristu rut te lawa rin se insambì dut te minge binatang ne ibpelengesa. 10 Su si Hisu Kristu, ne midtuman din ke kiyug te Eleteala su midumaan din ke langun ne insuhù kandin. Ne ke kinevehey rin te lawa rin te keseveka rà mekeatag te salà te langun tew ne nekegaga arà te kinekeawà te salà tew.

11 Ketà te baley ne ebpengerapan te minge Hudiyenen, ne uman gewii ne egelevek ke minge terebpelengesa te ebehey te Eleteala te binatang ne ibpelengesa ran ne edseupseupan dan te ed-ulaula ini. Ugaid ne kenà ded lavew ini ebpekegaga ne ed-awà dut te salà te minge etew. 12 Ugaid ne kenà iring ketà se kinevehey ni Hisu Kristu te lawa rin diyà te Eleteala te ebpepatey, su keseveka rà mulà se kinevehey rin te lawa rin dut te salà te minge etew ne ebpekegaga arà taman te taman. Neipus arà ne mibpinuu sikandin diyà te egkekewanan te Eleteala diyà te langit. 13 Ne riyà guntaan edtahad si Hisus taman te edtevanan te Eleteala ke kunterà din ne ebpegiekan te Eleteala kandan. 14 Su ke kinevehey ni Hisu Kristu te lawa rin ne ebpepatey te keseveka rà, ne midtidu rin ke minge etew wey midtilak din dut te lengesa rin su apey riyà te etuvangan te Eleteala ne ebmetilak dan taman te taman.

15 Ne benar ini su ruen dema impesabut dut te Kedesenan ne Ebpetuntul te Menusiyà ketà te impesurat din ne egkahi te,

16 “Ne ini se behu ne pasad ku
 ne ebeelan ku rut te minge etew ku keuremà.
 Ne ibpetahù ku ini se suhù ku diyà te itungan dan
 ne ibpesurat ku diyà te hinawa ran
 su apey ran egkerumai egenat te hinawa ran.”

17 Ne migkahi pà maa te,
 “Ne kenà ku en ebpenunduhèn ke meraat ne ulaula ran.”

18 Na geina te kenà ebpenunduhèn te Eleteala ke salà te minge etew, ne
 kenà en ebpegingawà te ruèn pà ibpelengesa ne ibehey te Eleteala te ked-
 awà dut te salà dan.

**Egkepakey en ne Ebpekeuvey ki te Eleteala su atag
 dut te Kinepebpatey ni Hisu Kristu Kenitew**

19 Engketà be, minge suled ku, ne atag dut te kinepebpatey ni Hisu
 kenitew, ne ruèn en dalan te ebpekelusud ki riyà te Punggus ne Berekat
 ne Ruhu ne dutun en ke Eleteala. 20 Su ketà te kinevehey ni Hisu
 ke hinawa rin te ebpebpatey, ne mibeelan din ke behu ne ralan te
 ebpekeuvey ki te Eleteala. Ne ebpekelusud ki riyà te Punggus ne Berekat
 ne Ruhu ibpepevayà ki Hisu ne mibpebpatey ugaid ne biviyag ded
 iya. Su in-awà din arà se impehelet kenitew te ed-uvey te Eleteala ne
 in-upama ketà te mekepal ne saput ne impekalang dut te ed-ubpaan te
 Eleteala diyà te baley ne mibeelan te minge Hudiyannen te ebpengarap te
 Eleteala. 21 Ne guntaani ne sikandin ke mepmeupiya pà ne ebpeninindeg
 kenitew diyà te Eleteala, ne sikandin se ebpekemalen dut te langun tew
 ne minge etew te Eleteala. 22 Tembù be ed-uvey kiyu en te Eleteala se
 egenat te keputian te atey tew ne kenà eduwaruwa se kebperetiyyaya
 tew kandin. Ed-uvey kiyu kandin su ke lengesa ni Hisu ke midtilak te
 hinawa tew rut te meraat ne ulaula ne igkevenari te hinawa tew, ne iring
 te midlùluan din ke lawa tew rut te metingew ne wayig. 23 Ne ebpetihel
 kiyu se egawed dut te kebpenareng tew te impasad te Eleteala, ini se
 kebpenareng ne nekahi tew en te ebperetiyyayaan tew. Su egkeserihan
 sikandin ne edtuman ke impasad din kenitew. 24 Ebpevegbeg-etei kiyu
 te ebpekita te limù te minge ruma tew, ne ebpetebtevangey kiyu te
 ed-ulaula te meupiya. 25 Ne kenà tew edlipatan ke kegkevurun tew te
 ebpengarap te Eleteala apey ki kenà ebpekeiring dut te ulaula te ruma pà
 ne minge etew. Ugaid ne iyan tew ed-ul-ulaan mulà ne ebpekevaher ki te
 kebperetiyyaya rut te ruma tew su netuenan tew se mehaan en se kedlived
 ni Hisu Kristu kayi te ampew te dunya.

26 Su embiya nesebutan tew en ke benar ne penurù mekeatag ki
 Hisu Kristu ugaid ne edtivevaan tew pà manen te ed-ulaula te meraat,
 ne warà en be egkepenareng tew te kebpekeliyu tew pà te salà tew.
 27 Inemulà te iyan tew rà egkepenareng ne kegkeandek dut te hewii te

kegkukuma te Eleteala kenitew. Su ketà ne ke langun ne mid-engkenà kandin ne edtutungen diyà te edsindrew ne apuy. ²⁸Su rengan ne misan engkey ne etew ne warà meduma rut te penduan ne intahak ki Moises, ne ruen deruwa etawa tetelu ne etew se nekekita ini ne ebpeketitihus te kinepekesurang din te penduan, ne ebpeimetayan te warà kegkeyruwi. ²⁹Ne embiya iring ketà se egketemanan dut te etew ne midsurang dut te penduan ni Moises, ne labi pà se kedusai rut te etew ne ed-engkenà ki Hisus ke Anak te Eleteala! Su ketà ne impekita rin se warà din peberepentaha ke lengesa ni Hisus ne imbehey te kinepatey ni Hisus su apey egketuman ke behu ne pasad te Eleteala ne ebpeketilak dut te salà din. Uya, labi pà se kedusai kandin su iring te pinegkeyà din ke Kedesenan ne Ebpetuntul te Menusiyà ke ebpayag dut te tavang te Eleteala kenitew. ³⁰Su netuenan tew ne ke Eleteala se migkahi te,

“Siaken se ebpenuisuli.

Siaken se edusa te minge etew ne ed-ulaula te meraat.”

Ne migkahi pà maa te,

“Siaken ke egkukum te minge etew ku.”

³¹Ne mekeandekandek nevenar embiya ebpekepeveyà ki te gehem te kukuman te Eleteala ne warà kemetayen din.

³²Tentenuri niyu ke hewii te behu kew pà ne mibperetiyaya ki Hisus ne nerayahan en ke itungan niyu. Su ruen merakel ne keresayan niyu, ugaid ne warà meawà ke kerinew te hinawa niyu. ³³Su ruen hewii ne mibpegkeyà kew wey meraat se imped-ulaula ran keniyu riyà te etuvangan te merakel ne etew. Ne ruen pà hewii ne impeninindeg niyu ke ruma niyu rut te meraat ne imped-ulaula kandan. ³⁴Ne impekita niyu ke kegkeyru niyu rut te nengevilanggù su midtevangen niyu sikandan. Ne misan pà te mid-ahew ke minge kearen niyu ne warà nemutu ke hinawa niyu. Uya, su netuenan niyu se ruen pà beripantag ne kearen niyu ne edtahad diyà te langit ne kenà egkeahew keniyu taman te taman. ³⁵Engketà be ne tigkeri niyu ke keresayan ne kenà niyu engkeri ke sarig niyu te Eleteala, su rekelà se keupianan ne egketelimà niyu ne impasad te Eleteala keniyu. ³⁶Iyan ungayà se edtigker kew te kemerehenan apey niyu egketuman ke kiyug te Eleteala ne ebpeketelimà kew rut te keupiya ne impasad te Eleteala. ³⁷Su ruen impesurat ne Lalag te Eleteala ne egkahi te,

“Warè en keuhetan din
ne iyan ebpengkayi ne ke ebpekeuma.
Ne ke kebpekeuma rin
ne kenà din edsenggelen.

³⁸Ne ke minge etew ne metidtu kayi te etuvangan ku ne edtigkeran dan te piya engkey se kemeresayan su atag dut te kebperetiyaya ran kediey.

Ugaid ne embiya ruen etew ne ed-engked se eduma kediey, ne warà iya kegekalew ku kandin.”

³⁹Ugaid ne sikitew ne kenà iring ketà se ulaula tew, su kenà kiyu en ed-iring dut te minge etew ne mid-engked ke kebperetiyaya ran ne edusaan te Eleteala. Su mevaher se kegawed tew te kebperetiyaya tew ne ketà be ne ebpekeliyu kiyu.

Ini ne Mekeatag te Tidtu ne Sarig

11 ¹Na, embiya duen tidtu ne sarig tew te Eleteala, ne netuenan tew iya se egketelimà tew ke meupiya ne ebpenerengen tew. Su egenat te sarig tew ne netuenan tew en rema se benar ini se keupiya rin misan kenà ta egkekita. ²Ne ke minge etew rengan ne nekesuhat te hinawa te Eleteala su egenat dut te sarig dan kandin.

³Ne sikitew rema, ne egenat dut te kedsarig tew ne netuenan tew te ini se kelibutan wey ke langun ne nekeriken kayi ne nelimbag te Eleteala egenat te lalag din dà. Engketà be ne ke langun ne egkekita tew kayi te dunya ne riyà ebpuun dut te kenà egkekita.

⁴Si Abel rengan, ne egenat te kedsarig din te Eleteala ne iyan nevirangan te Eleteala ke imbehey rin kandin ne meupiya pà dut te imbehey te kakey rin ne si Kain. Ne sabap dut te kedsarig din ne midtelimà sikandin ne metidtu riyà te etuvangan te Eleteala, tembù be midtelimà te Eleteala ke imbehey rin. Ne misan engketà te rengan dà ne minatey si Abel, ne ruen pà lavew egkepenurù kenitew kayi te kedsarig din.

⁵Ne iring din ded dema ke kedsarig ni Enoc te Eleteala rengan. Su sabat dut te kedsarig din ne warà mekepevayà te kepepatey sikandin su mid-ewit sikandin te Eleteala riyà te langit. Ne misan mibpemengà te minge etew sikandin, ne warà dan en mekita su riyen en ma te Eleteala. Ne ruen impesurat ne Lalag te Eleteala te kayi pà si Enoc te dunya ne nekesuhat sikandin te hinawa te Eleteala. ⁶Ne warà iya etew ne ebpekesuhat te hinawa te Eleteala embiya warà sarig din kandin. Su ke etew ne egkiyug ne ebpekeuvey te Eleteala, ne iyan ebpegingewaan ne ebperetiyayaan din nevenar te ruen Eleteala wey ebperetiyayaan din dema se edtavang ke Eleteala rut te etew ne ebpekeuvey kandin.

⁷Engketà ded be rema ke kedsarig ni Noe te Eleteala rengan. Su sabat dut te kedsarig din ne mibperetiyaya sikandin dut te imbaag te Eleteala ne ruen rimas ne ebpekeuma, misan warà din pà mekita te iring ketà. Ne midumaan din ke lalag te Eleteala su mibeelan din en ke rekelà ne avang ne ed-ingaranan te arka ne mid-untud dan en ketà se telteleanak. Ne ketà te kinelampey kayi te dunya, ne warà dan meherà. Su sabap dut te kedsarig din te Eleteala, ne nevirangan sikandin te Eleteala ne metidtu. Ugaid ne ke ruma pà ne minge etew ne midusaan te Eleteala te kepepatey su warà dan mebperetiyaya.

⁸Ne si Abraham dema rengan, ne sabap dut te kedsarig din te Eleteala ne midumaan din ke insuhù te Eleteala kandin te ebpeewaan dut te inged din su ebpendiyanen te inged ne impasad kandin te Eleteala, misan warà din metueni ke inged ne ebpevayaan kandin. ⁹Su ke kinesarig din te Eleteala ne mid-ubpà dan ketà te inged ne impasad kandin te Eleteala iring dut te ked-ubpà te nekererepuan dà ne menge etew. Ne ke menge baley ne midelesan dan ne mibeelan dut te lundis te binatang. Ne iring din ded dema te mid-ubpà ketà ke anak din ne si Isaac wey ke apù din ne si Jacob su ingkeragkes dan ded dema dut te impasad kandan te Eleteala. ¹⁰Ne midtigkeran ni Abraham te iring ketà ne ked-ubpà, su ruen ebpenerengen din ne inged ne kenà bulug egkereetan ne mibeelan te Eleteala diyà te langit.

¹¹Ne si Sara ke esawa ni Abraham ne midsarig rema te Eleteala. Su misan lukes en sikandin ne warà en kearus din te ed-anak, ne sabap dut te sarig din te Eleteala te edtumanen din ke impasad din kandin ne nekeanak ded sikandin. ¹²Ne si Abraham dema ne lukes en nevenar ne warè en kearus din te ebpekeanak den pà ki Sara. Ugaid ne misan iring ketà, ne si Abraham se nevaluy ne apù dut te medmerakel ne inenakan ne kenà egkeviring su ke kinekevuwad din ne iyan mibpeiringan se menge bituen diyà te langit wey ke kerakel te pantad diyà te beyvey te rahat.

¹³Langun kayi ne menge etew te migkahi ku geina ne warà migkurang ke sarig dan te Eleteala taman te minatey ran, misan warà den pà medtelimà arà se impasad kandan te Eleteala te biviyag den pà. Su netuenan dan se ebpekeuma ke hewii te edtumanen te Eleteala ke impasad din kandan, ne taman be te biviyag den pà ne impesabut dan te sikandan ne nekererepuan den dà kayi te ampew te dunya. ¹⁴Ne ke menge etew ne egkahi te nekererepuan den dà kayi te dunya ne ibpekita te ruen pà ebpenerengen dan ne tidtu ne inged dan diyà te langit ne ed-ubpaan dan taman te taman. ¹⁵Ne warà dan en pegpegitunga eni Abraham ke inged ne mid-ewaan dan en, su embiya ed-ul-ulaan den pà arà ne egkepakey ne edlived dan ketà. ¹⁶Inemulà se iyan dan egkiyuhan ne arà se inged ne muna pà se keupiya rin dut te mid-ewaan dan, su ini ne inged ne riyà te langit. Ne geina te arà se egkiyuhan dan ne kenà igkeyeyai rut te Eleteala ne edtewahan sikandin te Eleteala ran su ruen en inged ne impenehana rin kandan te ed-ubpà.

¹⁷⁻¹⁸Ne sabap dut te sarig ni Abraham te Eleteala ne mibperumaruma sikandin te kinesuhua kandin te Eleteala te ibehey ini se anak din si Isaac ne ibpelengesa te Eleteala. Insuhù kandin ini te Eleteala dut te hewii te kinebetelua kandin te Eleteala ke engkey se taman ne kevaher te kedsarig din te Eleteala. Ne misan sikandin se mibpesaran te Eleteala te sabap dut te ini se anak din si Isaac ne egkevuwad ke menge inenakan din, ne misan iring ketà ne malùmalù din ed-imetayi ini se budtung ne anak

din si Isaac su ibehey rin ne ibpelengesa te Eleteala. ¹⁹Su nepegitung ni Abraham se misan ed-imetayan din ke anak din si Isaac su ibehey rin te Eleteala, ne ruen gehem te Eleteala te ebenawen din ded sikandin. Ne benar ne ebpekeiring te nevanew sikandin, su embiya warà ungena te Eleteala si Abraham ne nepatey rin en ke anak din.

²⁰Ne guna su lukes en si Isaac ne impengeningeni rin ke minge anak din si Jacob wey si Esau ne intarem din kandan se ruen ibpenaub te Eleteala ne egketelimà dan keuremà. Intarem din ini su midserihan din se edtumanen te Eleteala ke impasad din dengan.

²¹Ne si Jacob dema ne midsarig te Eleteala, su guna te lukes en sikandin ne mehaan en ebpatay ne impengeningeni rin te ebpeneuven te Eleteala ke deruwa ne apù din ne minge anak ni Jose. Ne ketà ne midurungul te tuked din se ebpengarap te Eleteala.

²²Ne iring din ded dema ke kedsarig ni Jose te Eleteala, su ketà te mehaan en te kebpatay rin ne mibperetiyaya rin ded nevenar se edtumanen iya te Eleteala ke langun ne impasad din. Tembù be migkahi rin te ruen hewii ne ebpekeuma ne id-awà te Eleteala ke langun ne minge inenakan ni Israyil diyà te inged ne Ihiptu. Ne migkahi rin dema te ketà te hewii ne kebpekeawà dan en ne ibpeewit kandan ke minge tulan din su riyà ded ibpeleveng te inged ne ebpesineruwan dan.

²³Ne ke minge lukes ni Moises dema, ne ruen tidtu ne sarig dan te Eleteala. Su rut te hewii te kineenaka ki Moises ne ruen suhù te ratù te Ihiptu ne ebpeimetayan ke langun ne minge vatà ne meama te minge Hudiyanen. Ugaid ne warà meandek ini se lukes ni Moises te kenà eduma rut te suhù te datù su in-eles dan sikandin taman te nekedtetelu ne vulan su nekita ran se merayirayi ini se anak dan.

²⁴Ne netuntun te si Moises ne ruen sarig din ded dema te Eleteala. Su guna su midekelà en ne impekita rin ini te mid-ewaan din ke meupiya ne egketemanan din diyà te baley te bai ne anak te ratù te Ihiptu, su kenà din igkesuati ne birang sikandin ne anak dut te bai ke mid-anak-anak dà kandin. ²⁵Su iyan din midtumù ne egkerasey sikandin su riyà ded mebpekiduma rut te minge ruma rin ne Hudiyanen, ke minge etew te Eleteala, tumin dè be ke egkeamung-amung sikandin dut te meraat ne ulaula te minge etew te Ihiptu. Su netuenan din ne arà se minge ulaula ne pekerediyaan dà su edsahad dà. ²⁶Su nepegitung din te iyan pà meupiya se edtigkeran din ke meraat ne ibped-ulaula kandin su atag dut te kebperetiyaya rin ki Hisu Kristu ke ebperetuen te Eleteala keuremà, tumin dè be ke ebpekekuwa sikandin te langun ne kekewesai te inged te Ihiptu. Su ruen lalew ne ebpenerengen din ne ibehey kandin te Eleteala keuremà.

²⁷Ne sabap dut te sarig din te Eleteala ne mid-ewaan din ke inged ne Ihiptu ne warà meandek dut te epes te datù kandin. Ne misan pà merasey

en se ibpevayà din ne warè en sikandin medlived su iring ma te egkekita rin en ne eduma ke Eleteala kandin, ne ke kenà ma egkekita. ²⁸Ne sabap te sarig din dema te Eleteala ne iyan din midumaan ke insuhù te Eleteala kandin. Tembù be ebpetenuran din te menge Hudiyänen ke ed-ingaranan te “Kedsahad te Suluhuen te Eleteala.” Su edsumbali dan te bilibili ne ibpirik ke lengesa rin diyà te gumawan te menge baley ran su apey edsehari rà te suluhuen te Eleteala ne kenà ed-imetayan ke pingenayan ne anak dan ne meama.

²⁹Ne sabap dut te kedsarig dan dema te Eleteala, ne nekerapas dan te rahat ne ed-ingaranan te Merihà ne Rahat ne iring ded dut te memara ne tanà se ked-ipanew ran. Ugaid ne guna su migeraman dut te tegeihiptu te edtundug sikandan te edrapas ketà, ne nengelened dan en.

³⁰Ne sabap dut te kedsarig dan dema te Eleteala ne ke kutà ne nekelingut dut te inged ni Hiriku, ne menge kunterà dan, ne nehuvar arà su midtuman dan ke nekahi te Eleteala te ebpepinguten dan ketà se inged taman te pitu ne hewii. ³¹Ne sabap dut te sarig te senge etew ne meritan ne ed-ingaranan ki Rahab ne mid-ubpà ketà te inged ne Hiriku, ne misan meritan sikandin ne warà keeleran din te warà pà mebperetiyya sikandin, ne warà mekeragkes sikandin dut te mibpematey ne menge ruma rin te arà ne inged. Su ketà te kinepekeuma rut te deruwa ne etew ne midsuhù ni Josue te ebpepenitipen ke inged ne Hiriku ne midtevangen din sikandan su atag dut te sarig din te Eleteala. Ketà ne warà imetayi sikandin.

³²Ne kayi ku rà be edtemana ini se guhud ku mekeatag te etew ne midsarig en te Eleteala su edtendey e pà te meuhet ne hewii te keguhura ki Gideon, si Barak, si Samson, si Jepte, si David, si Samuel wey ke menge mibpelambas te lalag te Eleteala rengan. ³³Su sabap dut te kedsarig dan te Eleteala ne midtevangen dan te Eleteala. Su ruen mibpekibunù te derekelà ne inged ne midtavan dan. Ne ruen mibayàbayà te inged dan ne metidtu se ulaula ran, ne netelimà dan ke impasad kandan te Eleteala. Ne ruen imbehey te Eleteala ne gehem te edtelawà ke mewarew ne erimaung su iring te pinedtiem ke bèbà dut te erimaung su apey ran kenà mekekahat. ³⁴Ne ruen rumà pà ne intimbag te apuy ne warà mengetutung, inemulà te neevukan ke apuy. Ruma pà maa ne nekeliyu te kegkeimetayi kandan. Misan meluvey sikandan, ne mibaher dan te Eleteala. Ne mevurut dan se ebpekibunù su midtevanan dan ke kunterà dan te meriyù ne inged. ³⁵Ne sabap dut te sarig te menge meritan ne ke menge anak dan ne minatey ne nevanew red maa.

Duen дума pà ne menge etew ne mevaher se sarig dan te Eleteala ne nesigkem wey mibpekesekitan. Ne misan pà te nerasey ran taman te kinepatey ran ne iyan dan pinedtumù se ebpatey tumin dè be ke ebpekeengked dan dut te kebperetiyya ran, su netuenan dan ne

egkevanew red maa te Eleteala ne meupiya pà se ked-ubpà dan diyà te kandin. ³⁶Ruen pà ruma ne mibpegkeyà wey mibpenruug. Ne ruma pà ne mibakù te kedina ne impevilanggù. ³⁷Ne ruen pà lavew mid-imetayan te ebpenrumbehan te batu, ruen edtemperen ke lawa ran te havas, ne ruen pà se ibpetibas. Ruen дума ne nengesegeg dut te ubpaan dan ne ebpekelauglaug dan en se iyan den dà ibevelegkas se lundis te minge kamping wey bilibili. Neayuayu ran nevenar, ne nerehenan dan, ne meraat se imped-ulaula kandan. ³⁸Ne ebpekelauglaug dan su warà netail ne ubpaan dan. Ne riyà dan med-ubpà te lawed etawa riyà te buvungan etawa riyà te surung te dempilas wey riyà te vudsi te tanà. Ne geina te ruen sarig dan ne iring ketà, ne kenà dait ne ebpekiduma ran dut te minge meraat ne etew kayi te dunya.

³⁹Langun kayi ne minge etew ne nehuhud ku geina, ne sabap dut te sarig dan te Eleteala ne nekesuhat dan nevenar te hinawa rin misan warà den pà metelimà ke impasad te Eleteala kandan. ⁴⁰Su ruen pà maa meupiya ne netahù te itungan te Eleteala ne ini se kiyug din te sikandan se ebpetecharan pà kenitew su apey ke langun tew ne keseveka rà ebpeketelimà dut te impasad din ne arà se kedtidtuwa rin kenitew.

**Insempità te ini se keduma tew te Eleteala kayi te Ampew
te Dunya ne Ebpekeiring dut te Egkuya kiyu**

12 ¹Ne sikitew ke edsarig te Eleteala, ne ini se keduma tew kandin kayi te ampew te dunya ne ebpekeiring te egkuya ki te ebpelelahuy. Ne ke merakel ne minge mibperetiyaya rangsan se mibpesabut kenitew te egkeserihan nevenar ke Eleteala, ne iring te sikandan ke edtengteng kenitew kayi te kegkuya tew. Tembù be ed-engked kiyu en iya te piya engkey en ne ebpekeungen dut te keduma tew te Eleteala, ne ed-engked kiyu te piya engkey en ne meraat ne ulaula ne ebpengunguripen kenitew. Uya, ed-engkeran tew ke langun ne ebpekevangan kenitew su apey meabet se kebpelelahuy tew taman dut te edtemanan. ²Ne kenà kiyu ebpenlingilingi te keduma tew ki Hisus su sikandin ke ed-iringan tew su sikandin ke rudsuan te kedsarig tew wey sikandin ded ke edtemanan. Midtigkeran din en ke keresayen te kinelensanga kandin diyà te pinebelavag ne kayu, ne warà din ingkeyeyai te ked-imetayi ran kandin ketà su netuenan din te ruen igkehalew rin embiya egkeipus din ini se helevek din te ebpekiyu kenitew. Ne guntaani ne ebpepinuuwen en sikandin diyà te egkekewanan ketà te ebpinuuwan te Eleteala ne edatù.

³Iyan niyu pegpegitunga ne ke rasey ne impevayà ni Hisus dut te ulaula te minge mekesesalà ne etew ne mid-engkenà kandin. Iyan niyu pegpegitunga ne apey kew kenà egkeperà wey apey kew kenà ed-engked te ebperetiyaya. ⁴Su arà te ked-engked niyu te meraat ne ulaula ne

ibpenggeram keniyu, ne warà seveka rà ne ed-imatey keniyu atag dut te kebperetiyaya niyu. ⁵Menu, nelipatan niyu en ke impesurat ne Lalag te Eleteala ne ebag-et keniyu ne minge anak din? Su migkahi rin te,

“Anak ku, pemineg ka
embiya ebpetidtuwen te Eleteala ke ulaula niyu.
Ne kenà kew pekeluvey te eduma kandin
ke embiya edsewayan kew rin.

⁶ Su ebpetidtuwen din ke ulaula rut te langun ne igkelimù din ne ebpekesekitan din ke langun ne egkeviringan ne minge anak din ke embiya ed-ulaula ran te meraat.”

⁷Engketà be, ne tigkeri niyu ke kemerehenan su Eleteala se ebpenurù keniyu iring dut te ed-ul-ulaan te amey dut te anak din. Tigkeri niyu su arà se kemerehenan ne tuus te anak kew nikandin. Su ke amey, ne kenà din ebedtedayen ke anak din ne ed-ulaula te meraat, ugaid ne ebpekesekitan din ke anak din su apey ke ulaula rin ne ebpeketidtu. ⁸Su embiya kenà kew ebpekesekitan te Eleteala rut te meraat ne ed-ul-ulaan niyu iring dut te ulaula rin te ruma pà ne minge anak din, ne iring te in-anak kew te ingkehingey rà ne kenà kew venar ne minge anak din.

⁹Su kayi te ampew te dunya ne ebpekesekitan ki te amey tew, ugaid ne ed-edatan tew red lavew sikandan. Na, iyan pè be kenà ta edati wey perumdumai ke Eleteala ne Amey tew riyà te langit, su kayi te keduma tew kandin ne ebpekehaked ki te umur ne warà edtemanen din. ¹⁰Su ke amey tew kayi te dunya ne mibpekesekitan ki ran te mehaan dà ne hewii te batà ki pà, ne endei rà ke ingkeupiani te itungan dan mekeatag kenitew ne arà dà ke edumaan dan. Ugaid ne ke Eleteala ne Amey tew riyà te langit, ne iyan din kebpekesakit kenitew su netuenan din ne arà se ebpekegkeupiya kenitew su apey ki egkevaluy ne metidtu iring kandin. ¹¹Ne embiya ebpekesekitan ki te Eleteala ne kenà tew igkesuati su igkereheni ta gewii te ebpekepevayà ki ketà. Ugaid ne ke egketemanan tew ne meupiya ne sabap dut te kinepekesakit din kenitew ne ebmetidtu ke minge ulaula tew ne rutun ne ebmelintad ke hinawa tew.

¹²Engketà be arà ne ehetheta niyu ke kedsarig niyu te Eleteala su apey misan ebpekepevayà kew te kemerehenan ne kenà medlugkà se peretiyaya niyu. ¹³Ne kenà niyu engkeri te tidtu ne ralan ne ed-ikulen niyu su apey kenà medlugkà ke minge ruma niyu ne meluvey se kebperetiyaya rin ki Hisus, inemulà se ebpekevaher dut te kebperetiyaya ran.

¹⁴Ne uram kew te kenà kew ebpekevaal te kewahaan su apey ke itungan niyu dut te langun ne minge etew ne ebmelintad. Ne heleveka niyu te mevaher se kebmetidtu te ulaula niyu ne ebpekesehat te hinawa te Eleteala, su embiya kenà iring ketà se ulaula tew ne kenà ki egkekita te Eleteala.

¹⁵Uram kew te kenà kew ebpekeiniyug dut te tavang wey limù te Eleteala. Su ke etew ne ed-ulaula te iring kayi se ebpekepeneheewit te ruma pà ne etew su iring en be te sagbet ne ebehas te mepait ne ebpekeilu. ¹⁶Ne uram kew te kenà kew ed-ulaula te meredsik etawa ke ebpekewaraan niyu te hinawa niyu ke Eleteala iring ki Esau rengan. Su geina te pungenayan si Esau rut te amey rin ne ruen impasad kandin te Eleteala, ugaid ne insambì din dà ini se kewaris din te pungenayan te egkeenen ne keseveka rin dà egkeena. ¹⁷Ne neiseg-iseg dutun ne netuenan ta te nepegpegitung din se ebpekelived ded diyà te kandin ke kewaris te pungenayan su apey red dema egkepenaub sikandin te Eleteala. Ugaid ne kenà en egkepakey ne ebpekelived pà ini se kewaris ne insambì din su arà se ned-ulaula rin ne kenà en egkesembian, misan pà te midsinehew sikandin te kinepekedsendit din.

¹⁸Ne kayi te ini se behu ne ralan te kebpekeuvey tew te Eleteala, ne kenà kiyu egkeandek iring dut te impepevayà dengan te menge Hudiyanen. Su ketà te kineuvey ran te buvungan ne ed-ingaranan te Siney, ne ruen nekita ran ne egkeregreg ne apuy, ne ruen mevandes ne keramag, ne mibmerusireman dan misan meandew pà. ¹⁹Ne nerineg dan ke ebperiyupen ne budyung wey ke merahing. Ne guna su nerineg dan en ke Eleteala, ne mibuyù dan en te ibpeengked su nengeandek-andek dan, ²⁰su nengeandek dan ketà te migkahi te Eleteala te, “Embiya ruen ed-uvey kayi ne misan binatang dà ne ebpeimetayan te edrumbahen te batu.” ²¹Ne ketà te mekeandek ne nekita ran ne migkahi si Moises te migkerker sikandin te kinekeandek din.

²²Ugaid ne sikitew ve guntaan, ne ini ke ralan te kebpekeuvey tew te Eleteala ne kenè en iring dut te menge Hudiyanen dengan su iring te nekeuma ki en dut te buvungan ne ed-ingaranan te Siyun ne ed-ubpaan te Eleteala ne warà kemetayan din. Ne ini se inged ne riyà te langit ne ed-ingaranan te Behu ne Hirusalim ne ruen egngivungivuwun ne menge suluhuen din dema ne edeyù kandin. ²³Ne nekeamung kiyu en dut te ruma pà ne mibperetiyaya te Eleteala ne ke menge ngaran dan dema ne ingkesurat en diyà te langit, su langun tew ne menge anak te Eleteala. Ne iring te nekeuvey kiyu en ketà te langun ne mibperetiyaya ne minatey en ne mibmetidtu en nevenar te Eleteala riyà te langit. Ne iring te nekeuvey kiyu en dema te Eleteala ne egkukum dut te langun ne menge etew ²⁴wey riyà te ki Hisus ke midtuman dut te behu ne pasad te Eleteala, su impepevayà dut te lengesa rin ne netilak kiyu rut te salà tew. Su ke lengesa ni Hisus ne imbùbù din dut te kinepatey rin, ne muna pà se keupiya rin su tuus ini te limù te Eleteala te kebpeleyu kenitew, kenà iring dut te lengesa ni Abel rengan su ke lengesa rin ne tuus te kedusa te Eleteala rut te suled ni Abel ne mid-imatey kandin.

²⁵Na itaan niyu ve ke telinga niyu te eduma rut te lalag te Eleteala. Su ke menge etew rengan ne warà mebpemineg dut te kedseysey

kandan ni Moises te penduan te Eleteala, ne midusaan dan te Eleteala. Na iyan ki pè be kenè ki dusai embiya kenè ki ebperumaruma rut te impepenudtul din kenitew te Anak din ne riyà ebpuun te langit. ²⁶Su rangen te mibpekidlalag ke Eleteala ki Moises diyà te buvungan te Siney, ne nekugal ke dunya rut te kerekela te suwara rin. Ugaid ne guntani ne ruen pasad din te, “Ne egkugalan ku red maa te kenà ke dunya rà su misan ke langit dema.” ²⁷Ini se migkahi te Eleteala te keuremà ne egkugalen din ded maa ke dunya ne ibpesabut din te ini se dunya ne nelimbag din dengan ne egkepupus en su edsembian din te behu pà ne kenà egkepupus. ²⁸Engketà be ne ebpeselamat ki te Eleteala su ebpekeamung ki kandin te edatù ketà te behu ne dunya ne kenà egkevinasa taman te taman. Ebpeselamat ki wey ed-erapen tew ke Eleteala dut te ulaula ne ebpekesuhat te hinawa rin. Ne ed-edatan tew sikandin ne iduma se kegkeandek, ²⁹su ke Eleteala tew ne ruen gehem din te kedusa iring te regreg te apuy ne ebpeketutung te langun taman.

Menge Suhù dut te menge Mibperetiyaya

13 ¹Na sikiyu ke ebpenusuled te kineperetiyaya ne iyan niyu ibpeiseg ne ke kebbpelimlimuey niyu. ²Ne kenà niyu lipati se kegalàhalà niyu rut te menge etew ne ebpekepemenayik diyà te baley niyu misan kenà niyu sikandan egkekilala. Su rangen ne ruen nehalàgalà te menge etew ne warà dan metueni te suluhuen te Eleteala ne egenat te langit ini. ³Ne kenà niyu lipati se kedtawang niyu te ruma niyu ne riyà te bilengguan su iyan niyu kebpegitunga ne sikiyu red dema arà se nevilanggù. Ne tevangi niyu red dema ke menge ruma niyu ne egkerasey iring te sikiyu red ke egeram ketà.

⁴Ne edati niyu ke kedtiwelayà niyu ne kenà kew edlangkadlangkad dut te esawa nu. Su edusaan te Eleteala ke etew ne ed-iring ketà misan nekeesawa sikandin etawa kenà. ⁵Uram kew te kegkiyug niyu te pirak, ne endei rà taman se nearen niyu ne igkehalew niyu en arà. Su migkahi te Eleteala te,

“Kenà ku sikiyu ed-ewaan,
ne kenà ku sikiyu ebpedterayen.”

⁶Tembù be kenà ki egkeyeyaan te egkahi te,

“Ke Eleteala se edtawang kedì,
tembù kenà a egkeandek
misan engkey se ibped-ulaula
te menge etew kediey!”

⁷Kenà niyu lipati ke menge mibpeneheewit keniyu ne mibpenurù keniyu te Lalag te Eleteala. Iyan niyu pegpegitunga ke meupiya ne ulaula ran wey ke sarig dan ne warà mebparin taman te minatey ran, ne arà be se iringi niyu. ⁸Su ingenat dà te warà pà limbaha ini se dunya

taman guntaani en ne warà mebparin si Hisu Kristu, ne iring ded lavew sikandin taman te taman. ⁹Uram kew ke egkepeneheewit kew rut te merakel ne kenà tidtu ne penurù su ini ke kebpekesuwey niyu rut te benar ne impenurù keniyu. Ne warà duma ne ebpekevaher te kedsarig niyu te Eleteala ke kenà ke tavang din keniyu ne kenà kayi te keduma niyu te suhù mekeatag te liiyen te egkeenen, su ke kedtanud niyu ketà ne kenà ebpeketavang te kebperetiyaya niyu ki Hisus.

¹⁰Sikitew ke mibperetiyaya en ki Hisus ne ruen en ingkepelengesa rin ketà te kinepebpatey rin ne mid-awà dut te salà tew. Ugaid ne sikandan ke eduma pà te penduan ni Moises mekeatag te ebpelengesa te binatang diyà te ebpengerapan te menge Hudiyanen, ne kenà dan ebpekeamung dut te langun tew ne nekepeleyu ni Hisus te menge salà. ¹¹Embiya ruen ibpelengesa te Mepurù te Terebpelengesa mekeatag te salà te menge etew, ne ke lengesa rut te impelengesa rin ne ed-ewiten din diyà te lusud te Punggus ne Berekat ne Ruhu su ibehey rin te Eleteala. Ugaid ne ke lawa rut te impelengesa rin ne ed-ewiten dan diyà te liyu te inged dan ne ketà dan be edtutunga. ¹²Ne ke netemanan ni Hisus ne iring din ded dema ketà su mid-ewit dan sikandin diyà te liyu te inged te ked-imetayi kandin, ne ketà ne ke lengesa rin ne impetudà din se kedtilak dut te salà te menge etew. ¹³Engketà be ne impeliyu ki en dut te suhù te penduan ne intahak ki Moises. Ed-awà kiyu langun ketà ne ebpekeamung kiyu en ki Hisus dut te kinepekegkeyà din te kebpebpatey rin diyà te liyu te inged te menge Hudiyanen misan ebpekesekitan ki atag dut te keduma tew kandin. ¹⁴Su ini se ampew te dunya ne eranà tew rà su kenà ini se ubpaan tew taman te taman. Ugaid ne ruen ebpenerengen tew ne inged ne egkeubpaan tew riyà te langit. ¹⁵Ne ketà te kedtavang ni Hisus kenitew ne kenà kiyu ed-engked te kedeyù tew te Eleteala. Ne diyà dut te lalag tew ne ibpesabut tew ke kesebenaran te si Hisu Kristu rà ke Kerenan tew, su iring te ini se ibehey tew riyà te Eleteala. ¹⁶Ne kenà niyu lipati ke meupiya ne ulaula niyu rut te menge ruma niyu wey ke kebpetebtevangey niyu su ini ne timbang te ibehey niyu te Eleteala ne ebpekesuhat te hinawa rin.

¹⁷Perumaruma kew te idsuhù dut te menge etew ne ebpeneheewit te menge mibperetiyaya keniyen. Su sikandan ke midsuhù te Eleteala te edtuganur keniyu te meupiya, ne ruen hewii ne ebpekeuma ne ebpengetuvang dan diyà te Eleteala se ebpenudtul ke engkey se kinopenurù dan keniyu. Ne embiya edumaan niyu ke idsuhù dan, ne egkevag-et ke hinawa ran te edtuman dut te ibpehelevekan dan te Eleteala. Ugaid ne embiya kenà kew ebpemineg te suhù dan, ne egkerehenan dan ne warà keupianan ne egketelimà niyu.

¹⁸Ne kenà kew ed-engked te kebpengeningeni niyu kenami. Melintad se hinawa rey su warà netuenan dey ne mid-ulaula rey ne meraat, ne

iyan dey kiyug ne layun ki metidtu rut te ulaula tew. ¹⁹Ne ebuyuen ku keniyu te ipengeningeni a te Eleteala te mehaan ku kebpekeuli keniyau te keniyu.

Ubpu te Surat

^{20,21}Ne ke Eleteala ke mibanew ki Hisu Kristu rut te kinepatey rin, ne sikandin en ke pinekemepurù ne egkeuntan tew ne iring sikandin te tumetuganur dut te sikitew ne bilibili rin. Su ke lengesa rin ne impetudà ketà te kinepatey rin diyà te pinebelavag ne kayu ne arà ke tuus dut te behu ne pasad te Eleteala keytew, ini se pasad din ne warà kegkesembii rin taman te taman. Ne ibpengeningeni ku te Eleteala ne ebehey te melintad ne hinawa, ne ibehey rin kenitew ke langun ne ebpeketavang kenitew te kebpekeiseg te kedtumana tew te kandin ne kiyug. Ne ibpengeningeni ku red dema te sikandin se edtavang keniyu su apey kew ed-ulaula te ebpekesuhat te hinawa rin ibpepevayà dut te tavang ni Hisu Kristu keniyu. Ketà be ne edeyù kiyu ki Hisu Kristu taman te taman. Ne metuman be ini!

²²Menge suled ku, up-upiani niyu te ebpemineg ini se migkahi ku ne ibag-et te hinawa niyu su kenà be ini melayat se surat ku. ²³Iyan dema ibpesabut ku keniyu te si Timoteo, ke suled tew, ne nekeliyu en te kinekevilanggù din. Embiya mehaan ne ebpekeuma sikandin kayi, ne edumaan ku sikandin te ebpengkeniyau a te keniyu.

²⁴Ne penudtuli niyu ke langun ne ebpeneheewit te menge mibperetiyaya riyà wey langun ne menge etew te Eleteala ne ebpengpenginginsà key kandan. Ini se menge ruma tew te ebperetiyaya ne riyà ebpuun te Italya ne ebpengpenginginsà dema keniyu.

²⁵Iyan ku kiyug ne langun niyu ne ebpekeheram te tavang te Eleteala.